

清

史

稿

清史稿

儒林傳二

顧炎武

張爾岐

馬驥

萬斯大

兄斯道

子經

經官

胡渭

子彥昇

葉佩儀

毛奇齡

陸邦勳

閻若璩

字爾瞻

吳玉璣

惠周惕

子士奇

孫棫

余蕭客

陳厚耀

臧琳

元淵

禮堂

任啓運

全祖望

幼學

重校

沈彤

字德甫

盛世佐

江永

程萬里

褚寅亮

盧文弨

顯廣所

錢大昕

與子璜

站

王鳴盛

金日昫

吳峻

戴震

金榜

段玉裁

鈕樹玉

徐承慶

孫志祖

字聖俞

張玉璣

厚

劉台拱

朱彬

孔廣森

邵晉涵

周永年

王念孫

宋子綸引之

李惲 賈田 載

汪中

江德量

徐復

汪允維

武億

莊述祖

莊毅中

莊有司

戚學標

江有誥

陳鑑

李鳳

丁杰

周壽

孫星衍

畢亨

李貽德

王聘珍

凌廷堪

黃榜

汪鳳

桂馥

許瀚

江聲

顧元

錢大昭

子東垣

譚劉

朱駿聲

顧炎武字甯人原名絳崑山人明諸生生而雙眸中白邊黑讀書目十行下見明季多故講求經世之學明南都亡奉嗣母王氏避兵常熟崑山令楊永言起義師炎武及歸莊從之魯王授為兵部司務事不克幸而得脫母遂不食卒賊炎武弗事二姓唐王以兵部職方郎召母喪未赴遂去家不返炎武自負用世之略不得一遂所至輒小試之墾田於山東長白山下畜牧於山西雁門之北五台之東累致千金徧歷關塞四謁孝陵六謁思陵始卜居陝之華陰謂秦人

慕經學重處士持清議實他邦所少而華陰綰轂關河之口雖足不出戶亦能見天下之人聞天下之事一旦有警入山守險不過十里之遙若有志四方則一出關門亦有建瓴之便乃定居焉生平精力絕人自少至老無一刻離書所至之地以二贏二馬載書過邊塞亭障呼老兵卒詢曲折有與平日所聞不合即發書對勘或平原大野則於鞍上默誦諸經注疏嘗與友人論學云百餘年來之爲學者往往言心言性而茫然不得其解也命與仁夫子所罕言性與天道子貢所未得聞性命之理著之易傳未嘗數以語人其答問士則曰行己有恥其爲學則曰好古敏求其告哀公明善之功先之以博學顏子幾於聖人猶曰博我以文自曾子而下篤實無如子夏言仁則曰博學而篤志切問而近思今之君子則不然聚賓客門人數十百人與之言心言性舍多學而識以求一貫之方置四海之困窮不言而講危微精一是必其道高於夫子而其弟子之賢於子貢也孟子一書言心言性亦諄諄矣乃至萬章公孫丑陳代陳臻周霄彭更之所問與孟子之所答常在乎出處去就辭受取與之間是故性也命也

天也夫子之所罕言而今之君子之所恒言也出處去就辭受取與之辨孔子孟子之所恒言而今之君子之所罕言也愚所謂聖人之道者如之何曰博學於文行已有恥自一身以至於天下國家皆學之事也自子臣弟友以至出入往來辭受取與之間皆有恥之事也士而不先言恥則爲無本之人非好古多聞則爲空虛之學以無本之人而講空虛之學吾見其日從事於聖人而去之彌遠也炎武之學大抵主於歛華就實凡國家典制郡邑掌故天文儀象河漕兵農之屬莫不窮原究委改正得失撰天下郡國利病書百二十卷別有肇域志一編則考索之餘合圖經而成者精韻學撰音論三卷言古韻者自明陳第雖創闢榛蕪猶未遂密炎武乃推尋經傳探討本原又詩本音十卷其書主陳第詩無協韻之說不與吳械本音爭亦不用械之例但即本經之韻互考且證以他書明古音原作是讀非由遷就故曰本音又易音三卷即周易以求古音考證精確又唐韻正二十卷古音表二卷韻補正一卷皆能追復三代以來之音分部正軼而知其變又撰金石文字記求古錄與經史相證而日知錄三十

卷尤爲精詣之書蓋積三十餘年而後成其論治綜覈名實於禮教尤兢兢謂風俗衰廢恥之防潰由無禮以權之常欲以古制率天下炎武又以杜預左傳集解時有闕失作杜解補正三卷其他著作有二十一史年表歷代帝王宅京記亭林文集詩集營平二州地名記昌平山水記山東考古錄京東考古錄觚菰中隨筆等書並有補於學術世道清初稱學有根柢者以炎武爲最學者稱爲亭林先生又廣交賢豪長者虛懷商榷不自滿假作廣師篇云學究天人確乎不拔吾不如王寅旭讀書爲已探賸洞微吾不如楊雪臣獨精三禮卓然經師吾不如張稷若蕭然物外自得天機吾不如傅青主堅力苦學無師而成吾不如李中孚險阻備嘗與時屈伸吾不如路安卿博聞強記羣書之府吾不如吳志伊文章爾雅宅心和厚吾不如朱錫鬯好學不倦篤於朋友吾不如王山史精心六書信而好古吾不如張力臣至於達而在位其可稱述者亦多有之然非布衣之所得議也康熙十七年詔舉博學鴻儒科又修明史大臣爭薦之以死自誓二十一年卒年七十無子吳江潘耒敘其遺書行世宣統元年從

祀文廟

張爾岐字稷若濟陽人明諸生父行素官石首縣丞罹兵難爾岐欲身殉以母老止順治七年貢成均亦不出遜志好學篤守程朱之說著天道論中庸論爲時所稱又著學辨五篇曰辨志曰辨術曰辨業曰辨成曰辨徵又著立命說辨斥袁氏功過格立命說之非年三十覃思儀禮以鄭康成注文古質賈公彥釋義曼衍學者不能尋其端緒乃取經與注章分之定其句讀疏其節錄其要取其明注而止有疑義則以意斷之亦附於末成儀禮鄭注句讀十七卷附以監本正誤石經正誤二卷顧炎武游山東讀而善之曰炎武年過五十乃知不學禮無以立若儀禮鄭注句讀一書根本先儒立言簡當以其人不求聞達故無當世名然書實可傳使朱子見之必不僮謝監獄之稱許矣爾岐又著周易說略八卷詩說略五卷蒿菴集三卷蒿菴閒話二卷所居敗屋不修藝蔬果養母集其弟四人講說三代古文於母前愉愉如也妻朱婉婉執婦道勸爾岐勿出取蓼莪詩意題其室曰蒿庵遂教授鄉里終其身康熙十六年卒年六十六乾

隆中按察使吳江陸燿建蒿菴書院以祀之而顏其堂曰辨志山東善治經者爾岐同時有馬驥驥字宛斯鄒平人順治十六年進士除淮安府推官尋推官議裁補靈璧縣知縣獨荒除弊流亡復業康熙十二年卒於官年五十四士民奉祀名宦祠驥於左氏融會貫通著左傳事緯十二卷附錄八卷所論有條理圖表亦考證精詳驥又撰釋史一百六十卷纂錄開闢至秦末之事博引古籍疏通辨證非路史皇王大紀所可及也時人稱爲馬三代四十四年聖祖命大學士張玉書物色驥所著書令人至鄒平購板入內府

萬斯大字充宗鄆縣人父泰明崇禎丙子舉人與陸符齊名甯波文學風氣泰實開之以經史分授諸子使從黃宗羲遊各名一家斯大治經以爲非通諸經不能通一經非悟傳注之失則不能通經非以經釋經則亦無由悟傳注之失其爲學尤精春秋三禮於春秋則有專傳論世屬辭比事原情定罪諸義例於三禮則有論社論禘論祖宗論明堂泰壇論喪服諸義其辨正商周改月改時周詩周正及兄弟同昭穆皆極確實宗法十餘篇亦頗見推衍答應爲謙書辨



治朝無堂尤爲精覈根柢三禮以釋三傳較宋元以後空談書法者殊然其說經以新見長亦以鑒見短置其非存其是未始非一家之學斯大性剛毅慕義若渴明臣張煌言死後棄骨荒郊斯大葬之南屏父執陸符死無後斯大爲葬其兩世六棺所著有學春秋隨筆十卷學禮質疑二卷儀禮商三卷禮記偶箋三卷周官辨非二卷康熙二十二年卒年六十兄斯選字公擇學於黃宗羲嘗謂學者須驗之躬行方爲實學於是切實體認知意爲心之存主非心之所發理即在氣中非理先氣後涵養純粹年六十卒宗義哭之慟曰甬上從遊能續蕺山之傳者惟斯選一人而今已矣斯大子經字授一黃宗義移證人書院於鄞申明劉宗周之學經侍席末與聞其教及長傳父叔及兄言之學又學於應搢謙閻若璩康熙四十二年成進士選庶吉士散館授編修五十年充山西鄉試副考官五十三年提督貴州學政及還以派修通州城工罄其家素工分隸經乃賣所作字得錢給朝夕晚增補斯大禮記集解數萬言春秋定哀二公未畢又續纂數萬言又重修斯同列代紀年又續纂兄言尙書說明史舉要皆先

代未成之書乾隆初舉博學鴻詞科不就年八十二家遭大火遺書悉焚經終  
日涕洟自以爲負罪先人踰年卒著有分隸偶存二卷言字貞一斯選兄斯年  
子副榜貢生少隨諸父講社中號精博著有尙書說明史舉要嘗與修明史獨  
成崇禎長編故國輔相子弟多以賄求減先人罪言悉拒之尤工古文同縣李  
鄴嗣嘗曰事古而信篤志不分吾不如充宗粹然有得造次儒者吾不如公擇  
學通古今無所不辨吾不如季野文章名世居然大家吾不如貞一吾邑有萬  
氏誠天下之望有管邨文集晚出爲五河知縣忤大吏論死子承勳狂走數千  
里哀金五千贖之歸時稱孝子承勳字開遠諸生以薦用爲磁州知州工詩有  
冰雪集

胡渭初名渭生字臈明德清人渭年十二而孤母沈攜之避亂山谷間十五爲  
縣學生入太學篤志經義尤精輿地之學嘗館大學士馮溥邸尙書徐乾學奉  
詔修一統志開局洞庭山延常熟黃儀顧祖禹太原閻若璩及渭分纂渭著禹  
貢錐指二十卷圖四十七篇謂漢唐二孔氏宋蔡氏於地理多疏舛如三江當

主鄭康成說禹貢達於河河當從說文作荷榮波既豬當從鄭康成作播梁州黑水與導川之黑水不可溷爲一乃博稽載籍考其同異而折衷之山川形勢郡國分合道里遠近夷險一一討論詳明又漢唐以來河道遷徙爲民生國計所繫故於導河一章備考決溢改流之跡留心經濟異於迂儒不通時務間有千慮一失則不屑闕疑之過又撰易圖明辨十卷專爲辨定圖書而作初陳搏推闡易理衍爲諸圖其圖本準易而生故以卦爻反覆研求無不符合傳者務神其說遂歸其圖於伏羲謂易反由圖而作又因繫辭河圖洛書之文取大衍算數作五十五點之圖以當河圖取乾鑿度太乙行九宮法造四十五點之圖以當洛書其陰陽奇偶亦一一與易相應傳者益神其說又真以爲龍馬神龜之所負謂伏羲由此而有先天之圖實則唐以前書絕無一字符驗而突出於北宋之初由邵子以及朱子亦但取其數之巧合而未究暇其太古以來從誰授受故易學啟蒙易本義前九圖皆沿其說同時袁樞薛季宣皆有異論然宋史儒林傳易學啟蒙朱子本屬蔡元定創藥非朱子自撰晦菴大全集載答劉

君房書曰啟蒙本欲學者且就大傳所言卦畫蓍數推尋不須過爲浮說而自今觀之如河圖洛書亦不免尙有賸語至於本義卷首九圖爲門人所依附朱子當日未嘗堅立其說元陳應潤作爻變義蘊始指諸圖爲道家假借吳澄歸有光諸人亦相繼排擊毛奇齡黃宗羲爭之尤力然皆各據所見抵其罅隙尙未能窮溯本末一一抉所自來渭則於河圖洛書五行九宮參同先天太極龍圖易數鉤隱圖啟蒙圖書先天後天卦變象數流弊皆引據舊文互相參證以筮依托之口使學者知圖書之說乃修鍊術數二家旁分易學之支流非作易之根柢視禹貢錐指尤爲有功經學又撰洪範正論五卷謂漢人專取災祥推衍五行穿鑿附會事同譏緯亂彝倫攸敘之經其害一洛書本文具在洪範非龜文宋儒創爲黑白之點方員之體九十之位變書爲圖以至九數十數劉牧蔡季通紛紜更定其害二洪範元無錯簡王柏胡一中等任意改竄其害三渭又撰大學翼真七卷大旨以朱子爲主僅謂格致一章不必補傳力闢王學改本之誤所見切實視泛爲性命理氣之談者勝之遠矣渭經術洪深學有根柢

故所論一軌於正漢儒傳會之談宋儒變亂之論掃而除焉康熙四十三年聖祖南巡渭以禹貢錐指獻行在聖祖嘉獎御書耆年篤學四大字賜之儒者咸以爲榮五十三年卒年八十有二渭子彥昇字國賢雍正八年進士刑部主事改山東定陶縣知縣著春秋說四書近是叢書要錄又於樂律尤有心得著樂律表徵八卷渭同郡葉佩蓀字丹穎歸安人亦治古易不言圖書著易守四十卷於易中三聖人所未言者不加一字故曰守

毛奇齡字大可又名姓蕭山人四歲母口授大學即成誦總角陳子龍爲推官奇愛之遂補諸生明亡哭於學宮三日山賊起竄身城南山築土室讀書其中順治三年明保定伯毛有倫以寧波兵至西陵奇齡入其軍中是時馬士英方國安與有倫犄角奇齡曰方馬國賊也明公爲東南建義旗何可與二賊共事國安聞之大恨欲殺之奇齡遂脫去後怨家屢陷之乃變姓名爲王士方亡命浪游及事解以原名入國學康熙十八年薦舉博學鴻儒科試列二等授翰林院檢討充明史纂修官二十四年充會試同考官尋假歸得痺疾遂不復出初

著毛詩續傳三十八卷既以避讎流寓江淮間失其彙乃就所記憶著國風省篇詩札毛詩寫官記復在江西參議道施閏章所與湖廣楊洪才說詩作白鷺洲主客說詩一卷明嘉靖中鄞人豐坊偽造子貢詩傳申培詩說行世奇齡作詩傳詩說駁議五卷引證諸書多所糾正洎通籍進所著古今通韻十二卷聖祖善之詔付史館歸田後僦居杭州著仲氏易一日著一卦凡六十四日而書成託於其兄錫齡之緒言故曰仲氏又著推易始末四卷春秋占筮書三卷易小帖五卷易韻四卷河圖洛書原舛編一卷太極圖說遺議一卷其言易發明荀虞干侯諸家旁及卦變卦綜之法奇齡分校會閏時閱春秋房卷心非胡倫之偏有意撰述至是乃就經文起義著春秋毛氏傳三十六卷春秋簡書刊誤二卷春秋屬辭比事記四卷條例明晰考據精核又欲全著禮經以衰病不能乃次第著昏喪祭禮宗法廟制及郊社禘祫明堂學校諸問答多發先儒所未及至於論語大學中庸孟子各有考證而大學證文及孝經問授據古今辨後儒改經之非持論甚正奇齡淹貫羣書所自負者在經學然好爲駁辨他人所

已言者必力反其詞古文尙書自宋吳棫後多疑其僞及閻若璩作疏證奇齡力辨爲眞遂作古文尙書冤詞又刪舊所作尙書廣聽錄爲五卷以求勝於若璩而周禮儀禮奇齡又以爲戰國之書所作經問指名攻駁者惟顧炎武閻若璩胡渭三人以三人博學重望足以攻擊而餘子以下不足齒錄其傲睨如此素曉音律家有明代宗藩所傳唐樂笛色譜直史館據以作竟山樂錄四卷及在籍聞聖祖論樂諭羣臣以徑一圓三隔八相生之法因推闡考證撰聖諭樂本解說二卷皇言定聲錄八卷三十八年聖祖南巡奇齡迎駕於嘉興以樂本解說二卷進溫諭獎勞聖祖三巡至浙奇齡復謁行在賜御書一幅五十二年卒於家年九十一門人蔣樞編輯遺集分經集文集二部經集自仲氏易以下凡五十種文集合詩賦序記及他雜著凡二百三十四卷四庫全書收奇齡所著書目多至四十餘部奇齡辨正圖書排擊異學尤有功於經義弟子李塉陸邦烈盛唐王錫章大來邵廷案等著錄者甚衆李塉廷案自有傳邦烈字又超平湖人嘗取奇齡經說所載哀爲聖門釋非錄五卷謂聖問口語未可盡非云

閻若璩字百詩太原人世業鹽筴僑寓淮安父修齡以詩名家若璩幼多病讀  
書闇記不出聲年十五以商籍補山陽縣學生員研究經史深造自得嘗集陶  
宏景皇甫謐語題其柱云一物不知以爲深恥遭人而問少有暇日其立志如  
此海內名流過淮必主其家年二十讀尙書至古文二十五篇即疑其譌沈潛  
三十餘年乃盡得其癥結所在作古文尙書疏證八卷引經據古一一陳其矛  
盾之故古文之僞大明所列一百二十八條毛奇齡尙書古文冤詞百計相軋  
終不能以強辭奪正理則有據之言先立於不可敗也康熙元年遊京師旋改  
歸太原故籍補廩膳生十八年應博學鴻儒科試報罷崑山顧炎武以所撰日  
知錄相質即爲改定數條炎武虛心從之編修汪琬著五服考異若璩糾其謬  
尙書徐乾學歎服及乾學奉敕修一統志開局洞庭山若璩與其事若璩於地  
理尤精審山川形勢州郡沿革瞭如指掌撰四書釋地五卷及於人名物類訓  
詁典制事必求其根柢言必求其依據旁參互證多所貫通又據孟子七篇參  
以史記諸書作孟子生卒年月考一卷又著潛邱劄記六卷毛朱詩說一卷手



校困學紀聞二十卷因浚儀之舊而駁正箋說推廣之又有日知錄補正喪服異注宋劉攽李燾馬端臨王應麟四家逸事博湖掌錄諸書世宗在潛邸聞其名延入邸中索觀所著書每進一篇必稱善疾革請移就城外以大牀爲輿上施青紗帳二十人舁之出安穩如牀寢康熙四十三年卒年六十九世宗遣使經紀其喪親製詩四章復爲文祭之有云讀書等身一字無假孔思周情旨深言大僉謂非若璩不能當也子詠康熙四十八年進士官中書舍人亦能文同時山陽學者有李鎰吳玉楷鎰字公凱順治十八年進士補奉天蓋平縣知縣康熙十八年薦應博學鴻儒科試授翰林院編修與修明史洊官內閣學士所著有讀書雜述史斷王士禛稱爲有本之學玉楷字藉五官鳳陽府訓導著山陽志遺金石存說文引經考六書述部敘考又著別雅五卷辨六書之假借深爲有功非俗儒剽竊所能彷彿也

惠周惕字元龍原名恕吳縣人父有聲以九經教授鄉里與徐枋善周惕少從枋遊又曾受業于汪琬康熙十八年舉博學鴻儒科丁憂不與試三十年成進

士選翰林院庶吉士散館改密雲縣知縣有善政卒於官周惕遂於經學爲文章有樂度著有易傳春秋三禮問及硯谿詩文集其詩說二卷謂大小雅以音別不以政別謂正雅變雅美刺錯陳不必分六月以上爲正六月以下爲變文王以下爲正民勞以下爲變謂二南二十六篇皆房中之樂不必泥其所指何人謂天子諸侯均得有頌魯頌非僭其言並有依據清二百餘年談漢儒之學者必以東吳惠氏爲首惠氏三世傳經周惕其創始者也子士奇字天牧康熙五十年進士選翰林院庶吉士授編修兩充會試同考官聖祖嘗問廷臣誰工作賦內閣學士蔣廷錫以王頊齡湯右曾及士奇三人對五十七年孝惠章皇后升祔禮成特命祭告炎帝陵舜陵故事祭告使臣學士以上乃得開列士奇以編修與異數也五十九年充湖廣鄉試正考官尋提督廣東學政以經學倡多士三年之後通經者多又謂校官古博士也校官無博士之才弟子何所效法訪得海陽進士翁廷資即具疏題補韶州府教授部議格不行聖祖曰惠士奇所舉諒非徇私著如所請後不爲例雍正初復命留任召還入對不稱旨罰

修鎮江城以產盡停工創籍乾隆元年復起爲侍讀免欠修城銀令纂修三禮  
越四年告歸卒於家士奇盛年兼治經史晚尤邃於經學撰易說六卷禮說十  
四卷春秋說十五卷於易雜釋卦爻以象爲主力矯王弼以來空疏說經之弊  
於禮疏通古音古字俱使無疑似復援引諸子百家之文或以證明周制或以  
參考鄭氏所引之漢制以遞觀周制而各闡其制作之深意於春秋事實據左  
氏論斷多采公穀大致出於宋張大亨春秋五禮例宗沈棐春秋比事而典核  
過之大學說一卷晚出親民不讀新民論格物不外本末終始先後即矩矱之  
不外上下前後左右亦能根極理要又著交食舉隅三卷琴笛理數考四卷子  
七人棟最知名棟字定字元和學生員自幼篤志向學家多藏書日夜講誦於  
經史諸子稗官野乘及七經絃緯之學靡不津逮小學本爾雅六書本說文餘  
及急就章經典釋文漢魏碑碣自玉篇廣韻而下勿論也乾隆十五年詔舉經  
明行修之士陝甘總督尹繼善兩江總督黃廷桂交章論薦會大學士九卿索  
所著書未及呈進罷歸棟於諸經熟治貫串謂詁訓古字古音非經師不能辨

作九經古義二十二卷尤邃於易其撰易漢學八卷掇拾孟喜虞翻荀爽緒論以見大凡其末篇附以己意發明漢易之理以辨正河圖洛書先天太極之學易例二卷乃鎔鑄舊說以發明易之本例實爲棟論易諸家發凡其撰周易述二十三卷以荀爽虞翻爲主而參以鄭康成宋咸干寶之說約其旨爲注演其說爲疏書垂成而疾革遂闕革至未濟十五卦及序卦雜卦兩傳雖爲未善之書然漢學之絕者千有五百餘年至是而粲然復明撰明堂大道錄八卷禘說二卷謂禘行於明堂明堂法本於易古文尙書考二卷辨鄭康成所傳之二十四篇爲孔壁眞古文東晉晚出之二十五篇爲僞又撰後漢書補注二十四卷王士禎精華錄訓纂二十四卷九隴齋筆記松崖文鈔諸書嘉定錢大昕嘗論宋元以來說經之書盈屋充棟高者蔑古訓以誇心得下者襲人言以爲己有獨惠氏世守古學而棟所得尤精擬諸前儒當在何休服虔之間馬融趙岐輩不及也卒年六十二其弟子知名者余蕭客江聲最爲純實蕭客字古農長洲人撰古經解鈎沈三十卷凡唐以前舊說自諸家經解所引旁及史傳類書片

語單詞悉著於錄清代經學昌明著述之家爭及於古蕭客是書其一也蕭客又撰文選紀聞三十卷文選音義八卷聲自有傳

陳厚耀字泗源泰州人康熙四十五年進士官蘇州府教授大學士李光地薦其通天文算法引見改內閣中書上命試以算法繪三角形令求中綫及弧背尺寸厚耀具劄以進皆如式授翰林院編修入直內廷厚耀學問淵博直內廷後兼通幾何算法於是其學益進遷國子監司業轉左春坊左諭德以老乞致仕卒於家厚耀以天算之法治春秋嘗補杜預長麻爲春秋長麻十卷其凡有四一曰麻證備引漢書續漢書晉書隋書唐書宋史元史左傳注疏春秋屬辭天元麻理諸說以證推步之異其引春秋屬辭載杜預論日月差謬一條爲注疏所無又引大衍麻義春秋麻考一條亦唐志所未錄二曰古麻以古法十九年爲一章一章之首推合周麻正月朔日冬至前列算法後以春秋十二公紀年橫列爲四章縱列十二公續而成表以求麻元三曰麻編舉春秋二百四十二年推其朔閏及月之大小而以經傳干支爲證佐述杜預之說而考辨之四

曰厯存古厯推隱公元年正月庚戌朔杜氏長厯則爲辛巳朔乃古厯所推上年十二月朔謂元年以前失一閏蓋以經傳干支排次知之厚耀則謂如預之說元年至七年中書日者雖多不失而與二年八月之庚辰四年二月之戊申又不能合且隱公三年二月己巳朔日食桓公三年七月壬辰朔日食亦皆失之蓋隱公元年以前非失一閏乃多一閏因定隱公元年正月爲庚辰朔較長厯退兩月推至僖公五年止以下朔閏一一與杜厯相符故不復續推焉又撰春秋戰國異辭五十四卷通表二卷據遺一卷春秋世族譜一卷鄒平馬驥爲繹史兼采三傳國語國策厚耀則皆據於五書之外獨爲其難氏族一書與顧棟高大事表互證春秋氏族之學幾乎備矣厚耀又著禮記分類十七史正譌諸書今不傳

臧琳字玉林武進人諸生治經以漢注唐疏爲主教人先以爾雅說文曰不解字何以讀書不通訓詁何以明經鍵戶著述世無知者有尙書集解百二十卷經義雜記三十卷閻若璩稱其深明兩漢之學錢大昕校定其書云實事求是

別自精密而未嘗輕詆前哲斯真務實而不近名者元孫庸本名鏞堂字在東與弟禮堂俱事錢塘盧文弼沈默樸厚學術精審續其高祖將絕之學擬經義雜記爲拜經日記八卷高郵王念孫亟稱之其敍孟子年譜辨齊宣王湣王之誤閩縣陳壽祺歎爲絕識又著拜經文集四卷月令雜說一卷樂記二十三篇注一卷孝經考異一卷子夏易傳一卷詩考異四卷韓詩遺說二卷訂譌一卷校鄭康成易注二卷其輯子夏易傳辨此傳爲漢韓嬰作非卜子夏其詩考異大旨如王伯厚但逐條必自考輯不依循王本庸初因寶應劉台拱獲交儀徵阮元其後館元署中爲多元寫其書爲副本以原本還其家嘉慶十六年卒年四十五禮堂字和貴事親孝父繼宏久瘡冬月畏火禮堂潛以身溫被居喪如禮笑不見齒母遯危疾刲股合藥私禱於神減齒以延親壽娶婦胡初婚夕教以孝弟長言令熟聽乃合卺一家感而化之尤精小學善譬校爲四方賢士所貴師事錢大昕業益進好許氏說文解字爲說文經考十三卷纂古孝子孝女孝婦事作孝傳百數十卷尙書集解案六卷三禮注校字六卷春秋注疏校正

六卷卒年三十

任啟運字翼聖宜興人少讀孟子至卒章輒哽咽大懼道統無傳家貧無藏書從人借閱夜乏膏火持書就月至移牆不輟事父母以孝聞年五十四舉於鄉雍正十一年計偕至都會世宗問有精通性理之學者尙書張照以啟運名上特詔廷試以太極似何物對進呈御覽得旨嘉獎會成進士遂於臚唱前一日引見特授翰林院檢討在阿哥房行走上嘗問以朝聞夕死之旨啟運對以生死一理未知生焉知死上曰此是賢人分上事未到聖人地位從此作去久自知之逾年抱疾賜藥賜醫越月謝恩特諭繞廊而進面稱知汝非堯舜不敢以陳於王前務令自愛令侍臣扶掖以出且遙望之高宗登基仍命在書房行走署日講起居注官尋擢中允四年遷侍講管侍講學士七年擢都察院左僉都御史八年充三禮館副總裁官尋升宗人府府丞九年卒於賜第年七十五賜帑金治喪具賜祭葬啓運學宗朱子嘗謂諸經已有子朱子傳獨未及禮經乃著肆獻裸饋食禮三卷以儀禮特性少牢饋食禮皆士禮因據三禮及他傳記



之有關王禮者推之不得於經則求諸注疏以補之凡五篇一曰祭統二曰吉  
蠲三曰朝踐四曰正祭五曰繹祭其名則取周禮以肆獻裸享先王以饋食享  
先王之文較之黃幹所續祭禮更爲精密又宮室考十三卷於李如圭釋宮之  
外別爲類次曰門曰觀曰朝曰廟曰寢曰塾曰宇曰等威曰名物曰門大小廣  
狹曰明堂曰方明日辟雍考據頗爲精核儀禮一經久成絕學啟運研究鉤貫  
使條理秩然不愧窮經之目又禮記章句十卷以大學中庸朱子既成章句則  
曲禮以下四十七篇皆可釐爲章句但所傳篇次序列紛錯爰倣鄭康成序儀  
禮例更其前後併爲四十二篇其有關倫紀之大而爲秦漢元明輕變易者則  
衆著其說以俟後之論禮者酌取外有周易洗心九卷四書約指十九卷孝經  
章句十卷夏小正注竹書紀年考逸書補孟子時事考清芬樓文集等書其周  
易洗心則年六十時作觀象玩辭時闡精理啟運研窮刻苦既受特達之知益  
思報稱年七十二猶書自責語曰孔曾思孟實惟汝師日面命汝汝頑不知痛  
自懲責涕泗漣漣嗚呼老矣瞑目爲期及總裁三禮館喜甚因盡發中秘所儲

平心參訂目營手寫漏常二十刻不輟論必本天道酌人情務求合朱子遺意而心神煎耗竟以是終十四年詔學經學上諭有任啟運研窮經術敦樸可嘉之語三十七年命中外蒐集古今羣書高宗諭曰歷代名臣洎本朝士林夙望向有詩文專集及近時沈潛經史原本風雅如顧棟高陳祖范任啟運沈德潛輩亦各著成編並非勦說卮言可比均應概行查明在坊肆者或量爲給價家藏者或官爲裝印至有未經鐫刊祇係鈔本存留者不妨鈔錄副本仍將原本給還庶幾副在石渠用儲一覽於是上啓運所著書四種入四庫中

全祖望字紹衣鄞縣人十六歲能爲古文討論經史證明掌故補諸生雍正七年督學王蘭生選以充貢入京師旋舉順天鄉試戶部侍郎李紱見其文曰此深寧東發後一人也乾隆元年薦舉博學鴻詞是春會試先成進士選翰林院庶吉士不再與試時張廷玉當國與李紱不相能並惡祖望祖望又不往見二年散館寅之最下等歸班以知縣用遂不復出方詞科諸人未集紱以問祖望祖望爲記四十餘人各列所長性伉直既歸貧且病饔飧不給人有所餽弗受

主叢山端谿書院講席爲士林仰重二十年卒於家年五十有一祖望爲學淵博無涯浹於書無不貫串在翰林與紱共借永樂大典讀之每日各盡二十卷時開明史館復爲書六通移之先論藝文次論表次論忠義隱逸兩列傳皆以其言爲騷生平服膺黃宗羲宗羲表章明季忠節諸人祖望益廣修枋社掌故桑海道聞以益之詳盡而核實可當續史宗羲宋元學案甫創草藥祖望博采諸書爲之補輯編成百卷又七校水經注三箋困學紀聞皆足見其汲古之深又答弟子董秉純張炳將學鏞廬編等所問經史疑義錄爲經史問答十卷儀徵阮元嘗謂經學史才詞科三者得一足傳而祖望兼之其經史問答實足以繼古賢啟後學與顧炎武日知錄相埒晚年定文彙刪其十七爲鮚埼亭文集五十卷弟子同縣蔣學鏞字聲始乾隆三十六年舉人從祖望得聞黃萬學派學鏞尤得史學之傳董秉純字小鈍乾隆十八年拔貢補廣西那地州州判升秦安縣知縣全祖望文內外集均秉純一手編定

沈彤字果堂吳江人自少力學以窮經爲事貫串前人之異同折衷至當乾隆

元年薦舉博學鴻詞報罷與修三禮及一統志書成授九品官以親老歸彤庵通三禮以歐陽修有周禮官多田少祿且不給之疑後人多沿其說即有辨者不過以攝官爲詞乃詳究周制撰周官祿田考以辨正歐說分官爵數公田數祿田數三篇積算至爲精密其說自鄭注賈疏以後可云特出又撰儀禮小疏一卷取士冠禮士昏禮公食大夫禮喪服士喪禮爲之疏箋足訂舊義之譌其果堂集十二卷多訂正經學之文若周官頒田異同說五溝異同說井田軍賦說釋周官地征等篇皆援據典核又撰春秋左氏傳小疏尙書小疏氣穴考略內經本論彤性至孝親歿三年中不茹葷不內寢居恒每講求經世之務所著保甲論其後吳德旋見之稱爲最善云卒年六十五蔡德晉字仁錫無錫人雍正四年舉人乾隆二年禮部尙書楊名時薦德晉經明行修授國子監學正遷工部司務德晉嘗謂橫渠以禮教人最得孔門博約之旨故其律身甚嚴其論三禮多前人所未發著禮經本義十七卷禮傳本義二十卷通禮五十卷盛世佐字庸三秀水人官貴州龍里知縣撰儀禮集編四十卷集衆解而研辨之持

論謹嚴又楊復儀禮圖久行於世然其說本注疏而時有並注疏之意失之者一一是正至於諸家謬誤辨之尤詳焉

江永字慎修婺源人爲諸生數十年博通古今專心十三經注疏而於三禮功尤深以朱子晚年治禮爲儀禮經傳通解書未就黃氏楊氏相繼纂續亦非完書乃廣摭博討大綱細目一從吉凶軍嘉賓五禮舊次題曰禮經綱目凡八十卷引據諸書釐正發明實足終朱子未竟之緒嘗一至京師桐城方苞荆谿吳紱質以禮經疑義皆大折服讀書好深思長於比勘明推步鍾律聲韻歲實消長前人多論之者梅文鼎略舉授時而亦疑之永爲之說當以恒氣爲率隨其時之高衝以算定氣而歲實消長勿論其說至爲精當其論黃鍾之宮據管子呂氏春秋以正淮南子其論古韻平上去三聲皆當爲十三部入聲當爲八部而三代以上之音始有條不紊晚年讀書有得隨筆撰記謂周易以反對爲次序卦變當於反對取之否反爲泰泰反爲否故小往大來大往小來是其例也凡曰來曰下曰反自反卦之外卦來居內卦也曰往曰上曰進曰升自反卦

之內卦往居外卦也又謂兵農之分春秋時已然不起於秦漢證以管子左傳  
兵常近國都野處之農固不隸於師旅也其於經傳稽考精審多類此所著有  
周禮疑義舉要七卷禮記訓義擇言六卷深衣考誤一卷律呂闡微十卷律呂  
新論二卷春秋地理考實四卷鄉黨圖考十一卷讀書隨筆十二卷古韻標準  
四卷四聲切韻表四卷音學辨微一卷河洛精蘊九卷推步法解五卷七政衍  
金水二星發微冬至權度恒氣注脉辨歲實消長辨脉學補論中西合法擬草  
各一卷近思錄集注十四卷考訂朱子世家一卷乾隆二十七年卒年八十二  
弟子甚衆而戴震程瑤田金榜尤得其傳震榜自有傳瑤田字易疇歛人讀書  
好深沈之思學於江氏乾隆三十五年舉人選授太倉州學正以身率教廉潔  
自持告歸之日錢大昕王鳴盛皆贈詩推重至與平湖陸隴其並稱嘉慶元年  
舉孝廉方正同時舉者推錢大昭江聲陳鵬三人阮元獨謂瑤田足以冠之平  
生著述長於旁搜曲證不屑依傍傳注所著曰喪服足徵記宗法小記溝洫疆  
里小記禹貢三江考九穀考磬折古義水地小記解字小記聲律小記考工創

物小記釋草釋蟲小記年老目盲猶口授孫輩成琴音記東原戴氏自謂尙遜其精密

褚寅亮字楮升長洲人乾隆十六年召試舉人內閣中書官至刑部員外郎寅亮少以博雅名心思精銳於史書魯魚一見便能訂其誤謬中年覃精經術一以注疏爲歸從事禮經幾三十年墨守家法專主鄭學鄭氏周禮禮記注妄庸人羣起嗤點之獨儀禮爲孤學能發揮者固絕無而謬加指摘者亦尙少惟敖繼公集說多巧竄經文陰就已說後儒苦經注難讀喜其平易無疵之者萬斯大沈彤於鄭注亦多所糾駁至張爾岐馬駟但粗爲演繹其於敖氏之似是而非均未能正其失也寅亮著儀禮管見三卷於敖氏洞見其癥結驅豁其罽霧時公羊何氏學久無循習者所謂五始三科九旨七等六輔二類之義不傳於世惟武進莊存與默會其解而寅亮能闡發之撰公羊釋例三十篇謂三傳惟公羊爲漢學孔子作春秋本爲後王制作背議公羊者實違經旨又因何邵公言禮有殷制有時王之制與周禮不同作周禮公羊異義二卷世稱爲絕業又

長於算術著句股廣問三卷校正三統術衍刊本誤字甚多其中月相求六扞之數句六扞當作七扞推閏餘所在加十得一句加十當作加七皆寅亮說也著有十三經筆記十卷諸史筆記八卷諸子筆記二卷名家文集筆記七卷藏於家四十六年以病告歸主常州龍城書院八年五十五年卒年七十六

盧文弨字召弓餘姚人父存心乾隆初舉博學鴻詞科文弨乾隆十七年一甲進士授翰林院編修上書房行走歷官左春坊左中允翰林院侍讀學士三十年充廣東鄉試正考官三十一年提督湖南學政以條陳學政事宜部議降三級用三十三年乞養歸文弨孝謹篤厚潛心漢學與戴震段玉裁友善好校書所校逸周書孟子音義荀子呂氏春秋賈誼新書韓詩外傳春秋繁露方言白虎通獨斷經典釋文諸善本鏤板惠學者又苦鏤板難多則合經史子集三十八種而名之曰羣書拾補所自著書有抱經堂集三十四卷儀禮注疏詳校十七卷鍾山劄記四卷龍城劄記三卷廣雅釋天以下注二卷皆使學者提正積非蓄疑渙釋其言曰唐人之爲義疏也本單行不與經注合單行經注唐以後



尙多善本自宋後附疏於經注而所附之經注非必孔賈諸人所據之本也則兩相齟齬矣南宋後又附經典釋文於注疏間而陸氏所據之經注又非孔賈諸人所據也則齟齬更多矣淺人必比而同之則彼此互改多失其真幸有改之不盡以滋其齟齬啟人考核者故注疏釋文合刻似便而非古法也其特識多類此文昭歷主江浙各書院講席以經術導士江浙士子多信從之學術爲之一變六十年卒年七十九文昭校書參合各本擇善而從頗引他書改本書而不專主一說故嚴元照詆其儀禮詳校顧廣圻譏其釋文考證後黃丕烈影宋刻書各本同異另編於後兩家各有宗旨亦互相補苴云顧廣圻字千里元和人諸生吳中自惠氏父子後江聲繼之後進翕然多好古窮經之士廣圻讀惠氏書盡通其義論經學云漢人治經最重師法古文今文其說各異若混而一之則轆轤不勝矣論小學云說文一書不過爲六書發凡原非字義盡於此廣圻天質過人經史訓詁天算輿地靡不貫通至於目錄之學尤爲專門時人方之王仲寶阮孝緒兼工校讐同時孫星衍張敦仁黃丕烈胡克家延校宋本

說文禮記儀禮國語國策文選諸書皆爲之札記考定文字有益後學乾嘉間以校讐名家文昭及廣圻爲最著云又時爲漢學者多譏宋儒廣圻獨取先儒語錄摘其切近者爲遯翁苦口一卷以教學者著有思適齋文集十八卷道光十九年卒年七十

錢大昕字曉徵嘉定人乾隆十六年召試舉人授內閣中書十九年進士選翰林院庶吉士散館授編修大考二等一名擢右春坊右贊善累充山東鄉試湖南鄉試正考官浙江鄉試副考官大考一等三名擢翰林院侍講學士三十二年乞假歸三十四年補原官入直上書房遷詹事府少詹事充河南鄉試正考官尋提督廣東學政四十年丁父艱服闋又丁母艱病不復出嘉慶九年卒年七十七大昕幼慧善讀書時元和惠棟吳江沈彤以經術稱其學求之十三經注疏又求之唐以前子史小學大昕推而廣之錯綜貫串發古人所未發任中書時與吳煥褚寅亮同習梅氏算術及入翰林禮部尙書何國宗世業天文年已老聞其善算先往見之曰今同館諸公談此道者鮮矣大昕於中西兩法剖

析無遺用以觀史自太初三統四分中至大衍下迄授時朔望薄蝕淺犯進退  
挾摘無遺漢三統術爲七十餘家之權輿訛文與義無能正之者大昕衍之據  
班志以闡劉歆之說裁志文之訛二千年已絕之學昭然若發蒙大昕又謂古  
法歲陰與太歲不同淮南天文訓攝提以下十二名皆謂歲陰所在史記太初  
元年年名馬逢攝提格者歲陰非太歲也東漢後不用歲陰紀年又不知太歲  
超辰之法乃以太初元年爲丁丑歲則與史漢之文皆悖矣又謂尙書緯四遊  
升降之說即西法日躔最高卑之說宋楊忠輔統天術以距差乘躔差減氣汎  
積爲定積梅文鼎謂郭守敬加減歲餘法出於此但統天求汎積必先減氣差  
十九日有奇與郭又異文鼎不能言大昕推之同凡步氣朔必以甲子日起算  
今統天上元冬至乃戊子日不值甲子依授時法當加氣應二十四日有奇乃  
得從甲子起今減去氣差是以上元冬至後甲子日起算也既如此當減氣應  
三十五日有奇今減十九日有奇者去躔差之數不算也求天正經朔又減閏  
差者經朔當從合朔起算今推得統天上元冬至後第一朔乃乙丑戊初二刻

弱故必減閏差而後以朔實除之即授時之朔應也大昕始以辭章名沈德潛  
吳中七子詩選大昕居一既乃研精經史於經義之衆訟難決者皆能剖析源  
流文字音韻訓詁天算地理氏族金石以及古人爵里事實年齒瞭如指掌古  
人賢姦是非疑似難明者典章制度昔人不能明斷者皆有確見惟不喜二氏  
書嘗曰立德立功立言吾儒之不朽也先儒言釋氏近於墨子以爲釋氏亦終  
於楊氏爲己而已彼棄父母而學道是視己重於父母也大昕在館時常與修  
音韻述微續文獻通考續通志一統志天球圖諸書所著有唐石經考異一卷  
經典文字考異一卷聲類四卷廿二史考異一百卷唐書史臣表一卷唐五代  
學士年表二卷宋學士年表一卷元史氏族表三卷元史藝文志四卷三史拾  
遺五卷諸史拾遺五卷通鑑注辨證三卷四史朔閏考四卷吳興舊德錄四卷  
先德錄四卷洪文惠洪文敏王伯厚王昇州四家年譜各一卷疑年錄三卷潛  
學堂文集五十卷詩集二十卷潛學堂金石文跋尾二十五卷養新錄二十三  
卷恒言錄六卷竹汀日記鈔三卷族子塘站能傳其學塘字學淵乾隆四十五

年進士改教職選江甯府學教授塘少大昕七歲相與共學又與大昕弟大昭及弟玷相切磋爲實事求是之學於聲音文字律呂推步尤有神解著律呂古義六卷據所得漢慮僂銅尺正荀勗以劉歆銅斛尺爲周尺之非謂周本八寸尺不古律可以制律律必用十寸尺即昔人所云夏尺周因夏商夏商因唐虞古律當無異度又史記三書釋疑三卷於律厯天官家言皆究其原本而以他書疏通證明之律書上九商八羽七角六宮五徵九數語注家皆不能曉小司馬疑其數錯塘據淮南子太元經證之始信其確又著泮宮雅樂釋律四卷說文聲繫二十卷淮南天文訓補注三卷其所作古文曰述古編凡四卷卒年五十六玷字獻之副榜貢生游京師朱筠引爲上客以直隸州州判官於陝與洪亮吉孫星衍討論訓詁輿地之學論者謂玷沈博不及大昕而精富過之嘉慶二年教匪擾陝西玷時署華州率衆禦城力竭其衝城無弓矢仿古爲合竹強弓厚背紙爲翎二人共發之達百五十步又以意爲發石之法石重十斤達三百步前後斃賊無算城獲全以積勞得末疾引歸著史記補注百二十卷詳於

音訓及郡縣沿革山川所在陝甘總督松筠重其品學親至臥榻問疾索未刊著述塤取付之曰三十年精力盡於此書矣十一年卒年六十六又有詩音表一卷車制考一卷論語後錄五卷爾雅釋義十卷釋地以下四篇注四卷十經文字通正書十四卷說文斟詮十四卷新解注地理志十六卷漢書十表注十卷聖賢冢墓志十二卷

王鳴盛字鳳喈嘉定人幼從長洲沈德潛受詩後又從惠棟問經義遂通漢學乾隆十九年以一甲進士授翰林院編修大考翰詹第一擢侍讀學士充福建鄉試正考官尋擢內閣學士兼禮部侍郎坐濫支驛馬左遷光祿寺卿丁內艱遂不復出鳴盛性儉素無聲色玩好之娛晏坐一室呬唔如寒士嘗言漢人說經必守家法自唐貞觀撰諸經義疏而家法亡宋元豐以新經學取士而漢學殆絕今好古之儒皆知崇注疏矣然注疏惟詩三禮及公羊傳猶是漢人家法他經注則出魏晉人未爲醇備著尙書後案三十卷專述鄭康成之學若鄭注亡逸采馬王注補之孔傳雖出東晉其訓詁猶有傳授間一取焉又謂東晉所

獻之太誓僞而唐人所斥之太誓非僞故附書今文太誓一篇存古之功自謂不減惠氏周易述也又著周禮軍賦說四卷發明鄭氏之旨又十七史商榷一百卷於一史中紀志表傳互相稽考因而得其異同又取碑史叢說以證其舛誤於輿地職官典章名物每致詳焉別撰蛾術編一百卷其爲目十說錄說字說地說制說人說物說集說刻說通說系蓋仿王應麟輿炎武之意而援引尤博詩以才輔學以韻達情古文用歐曾之法闡許鄭之義有詩文集四十卷嘉慶二年卒年七十六弟子同縣金曰追字對揚諸生深於九經正義每有疑譌隨條輒錄先成儀禮注疏正僞十七卷阮元奉詔校勘儀禮石經多采其說時同縣通經學者有吳淩雲字得青嘉慶五年歲貢讀書深造經師遺說靡不通以嘗假館錢大昕屏守齋盡讀所藏書學益邃所著十三經攷異援據精核多前人所未發又經說三卷小學說廣韻說各一卷海鹽陳其幹爲合刊之題曰吳氏遺著

戴震字東原休甯人讀書好深湛之思少時塾師授以說文三年盡得其節目

年十六七研精注疏實事求是不主一家與郡人鄭牧汪肇龍方矩程瑤田金榜從婺源江永游震出所學質之永永爲之駭歎永精禮經及推步鍾律音聲文字之學惟震能得其全性特介年二十八補諸生家屢空而學日進與吳縣惠棟吳江沈彤爲忘年友以避讎入都北方學者如獻縣紀昀大興朱筠南方學者如嘉定錢大昕王鳴盛餘姚盧文弨青浦王昶皆折節與交尙書秦蕙田纂五禮通考震任其事爲乾隆二十七年舉鄉試三十八年詔開四庫館徵海內淹貫之士司編校之職總裁薦震充纂修四十年特命與會試中式者同赴殿試賜同進士出身改翰林院庶吉士震以文學受知出入著作之庭館中有奇文疑義輒就咨訪震亦思勤修其職晨夕披檢無間寒暑經進圖籍論次精審所校大戴禮記水經注尤精核又於永樂大典內得九章五曹算經七種皆王錫闡梅文鼎所未見震正譌補脫以進得旨刊行四十二年卒於官年五十有五震之學由聲音文字以求訓詁由訓詁以尋義理謂義理不可空憑胸臆必求之於古經求之古經而遺文垂絕今古懸隔必求之古訓古訓明則古經



明古經明則賢人聖人之義理明而我心之同然者乃因之而明義理非他存乎典章制度者也彼岐古訓義理而二之是古訓非以明義理而義理不寓乎典章制度勢必流入於異學曲說而不自知也震爲學精誠解辨每立一義初若創獲及參考之果不可易大約有三曰小學曰測算曰典章制度其小學書有六書論三卷聲韻考四卷聲類表九卷方言疏證十卷漢以後轉注之學失傳好古如顧炎武亦不深省震謂指事象形諧聲會意四者爲書之體假借轉注二者爲書之用一字具數用者爲假借數字共一用者爲轉注初哉首基之皆爲始叩吾台予之皆爲我其義轉相注也又自漢以來古音浸微學者於六書之故靡所從入顧氏古音表入聲與廣韻相反震謂有入無入之韻當兩兩相配以入聲爲之樞紐眞至仙十四韻與脂微齊皆灰五韻同入聲東至江四韻及陽至登八韻與支之佳哈蕭宵肴豪尤侯幽十一韻同入聲侵至凡九韻之入聲則從廣韻無與之配魚虞模歌戈麻六韻廣韻無入聲今同以鐸爲入聲不與唐相配而古音遞轉及六書諧聲之故胥可由此得之皆古人所未發

其測算書原象一卷迎日推策記一卷句股割圓記三卷麻問一卷古麻考二卷續天文略三卷策算一卷自漢以來疇人不知有黃極西人入中國始云赤道極之外又有黃道極是爲七政恆星右旋之樞此爲六經所未有震謂西人所云赤極卽周髀之正北極也黃極卽周髀之北極璿璣也虞書在璿璣玉衡以齊七政蓋設璿璣以擬黃道極也黃極在柱史星東南上弼少弼之間終古不隨歲差而改赤極居中黃極環繞其外周髀固已言之不始於西人也震所著典章制度之書未成有詩經二南補注二卷毛鄭詩考四卷尙書義考一卷儀經考正一卷考工記圖二卷春秋即位改元考一卷大學補注一卷中庸補注一卷孟子字義疏證三卷爾雅文字考十卷經說四卷水地記一卷水經注四十卷九章補圖一卷屈原賦注七卷通釋三卷原善三卷緒言三卷直隸河渠書一百有二卷氣穴記一卷藏府算經論四卷算法贅言四卷文集十卷震卒後其小學則高郵王念孫金壇段玉裁傳之測算之學則曲阜孔廣森傳之典章制度之學則興化任大椿傳之皆其弟子也後十餘年高宗以震所校水

經注問南書房諸臣曰戴震尙在否對曰已死上惋惜久之王念孫段玉裁孔廣森任大椿自有傳金榜字輔之歙縣人乾隆二十九年召試舉人授內閣中書軍機處行走三十七年一甲一名進士授翰林院修撰散館後養病讀書不復出卒於家師事江永友戴震著禮箋十卷刺取其大者數十事爲三卷寄朱珪珪序之以爲詞精義核榜治禮最尊康成然博稽而精思慎求而能斷嘗援鄭志答趙商云不信亦非悉信亦非斯言也敢以爲治經之大法故鄭義所未衷者必糾正之於鄭氏家法不敢誣也

段玉裁字若膺金壇人生而穎異讀書有兼人之資乾隆二十五年舉人至京師見休寧戴震好其學遂師事之以教習得貴州玉屏縣知縣旋調四川署富順及南溪縣事又辦理化林坪站務時大兵征金川輓輸絡繹玉裁處分畢輒篝鐙著述不輟著六書音均表五卷古韻自顧炎武析爲十部後江永復析爲十三部玉裁謂支佳一部也脂微齊皆灰一部也之哈一部也漢人猶未嘗淆借通用晉宋而後乃少有出入迄乎唐之功令支注脂之同用佳注皆同用灰

注哈同用於是古之截然爲三者罕有知之又謂眞臻先與諄文殷魂痕爲二尤幽與侯爲二得十七部其書始名詩經韻譜羣經韻譜嘉定錢大昕見之以爲鑿破混沌後易其體例增以新加十七部蓋如舊也震偉其所學之精云自唐以來講韻學者所未發尋任巫山縣年四十六以父老引疾歸鍵戶不問世事者三十餘年玉裁於周秦兩漢書無所不讀諸家小學皆別擇其是非於是積數十年精力專說說文著說文解字注三十卷謂爾雅以下義書也聲類以下音書也說文形書也凡篆一字先訓其義次釋其形次釋其音合三者以完一篆故曰形書又謂許以形爲主因形以說音說義其所說義與他書絕不同者他書多假借則字多非本義許惟就字說其本義知何者爲本義乃知何者爲假借則本義乃假借之權衡也說文爾雅相爲表裏治說文而後爾雅及傳注明又謂自倉頡造字時至唐虞三代秦漢以及許叔重造說文曰某聲曰讀若某者皆條理合一不紊故旣用徐鉉切音又某字志之曰古音第幾部後附六書音均表俾形聲相爲表裏始爲長編名說文解字讀凡五百四十卷旣乃

隱括之成此注玉裁又以說文者說字之書故有讀如無讀爲說經傳之書必兼是二者漢人作注於字發疑正讀其例有三讀如讀若者擬其音也比方之詞讀爲讀曰者易其字也變化之詞當爲者定爲字之誤聲之誤而改其字也救正之詞三者分而漢注可讀而經可讀述漢讀考先成周禮六卷又撰禮經漢讀考一卷其他十六卷未成儀徵阮元謂玉裁書有功於天下後世者三言古音一也言說文二也漢讀考三也其他說經之書以漢志毛詩經毛詩古訓傳本各自爲書因釐次傳文還其舊著重訂毛詩古訓傳三十卷以諸經惟尙書離厄最甚古文幾亡賈逵分別古今劉向是正文字其書皆不存乃廣蒐補闕正晉唐之妄改存周漢之駁文著古文尙書撰異三十二卷又錄左氏經文取鄭注禮周禮存古文今文故書之例附見公羊穀梁經文之異著春秋左氏古經十二卷而以左氏傳五十凡附後外有毛詩小學三十卷汲古閣說文訂六卷經韻樓集十二卷二十年卒年八十一初玉裁與念孫俱師震故戴氏有段王兩家之學玉裁少震四歲謙專執弟子禮雖耄或稱震必垂手拱立朔望

必莊誦震手札一通卒後王念孫謂其弟子長洲陳奐曰若膺死天下遂無讀  
書人矣王裁弟子長洲徐頌嘉興沈濤及女夫仁和龔麗正俱知名而奐尤得  
其傳奐自有傳鈕樹玉字匪石吳縣人篤志好古不爲科舉之業精研文字聲  
音訓詁謂說文懸諸日月而不刊者也後人以新附淆之誣許君矣因博稽載  
籍著說文新附考六卷續考一卷又著說文解字校錄三十卷樹玉後見王裁  
書著段氏說文注訂八卷所駁正之處皆有依據徐承慶字夢祥元和人乾隆  
五十一年舉人官至山西汾州府知府著段注匡謬十五卷其攻瑕索癥尤勝  
鈕氏之書皆力求其是非故爲吹求者

孫志祖字詒穀仁和人乾隆三十一年進士改刑部主事洊升郎中擢江南道  
監察御史乞養歸志祖清修自好讀經史必釋其疑而後已著讀書脞錄七卷  
考論經子雜家折衷精詳不爲武斷之論又家語疏證六卷謂王肅作聖證論  
以攻康成又僞撰家語飾其說以欺世因博集羣書凡肅所勦竊者皆疏通證  
明之又謂孔叢子亦王肅僞託其小爾雅亦肅借古書以自文並作疏證以辨

其妄幼熟經文選後乃仿韓文考異之例參稽衆說正俗本之誤爲文選考異四卷又輯前人及朋輩論說爲文選注補正四卷又有文選理學權輿補一卷輯風俗通逸文一卷補正姚之駟輯謝承後漢書五卷嘉慶六年卒年六十五翟灝字大川亦仁和人乾隆十九年進士官金華衢州府學教授灝見聞淹博又能搜奇引痺嘗與錢塘梁玉繩論王肅撰家語難鄭氏欲搜考以證其謬因握筆互疏所出頃刻數十事時方被酒旋罷去未竟藥其精力殊絕人也著有爾雅補郭二卷以爾雅郭注未詳未聞者百四十二科刑疏補言其十餘仍闕如乃參稽衆家一一備說又云古爾雅當有釋禮篇與釋樂篇相隨祭名與講武旌旂三章乃釋禮之殘缺失次者又著四書考異七十二卷皆貫串精審爲世所推他著又有家語發覆通俗篇湖山便覽無不宜齋詩文彙五十二年卒梁玉繩字曜北錢塘人增貢生家世貴顯玉繩不志富貴自號清白士嘗語弟履繩曰後漢襄陽樊氏顯重當時子孫雖無名德盛位世世作書生門戶願與弟共勉之故玉繩年未四十棄舉子業專心撰著其警記七卷多釋經之文有

裨古義玉繩尤精乙部書著史記志疑三十六卷據經傳以糾乖違參班荀以究同異大昕稱其書爲龍門功臣著人表考九卷謂班氏借用禹貢田賦九等之目造端自馬遷史記李將軍傳云李蔡爲人在下中其說頗是履繩字處素乾隆五十三年舉人與兄玉繩相磐錯有元方季方之目其於衆經中尤精左氏傳謂隋志載賈逵解詁服虔解義各數十卷今俱亡佚杜氏參用賈服仲達作疏間有稱引未覩其全亦如馬融諸儒之說僅存單文隻義唐以後注左氏者惟張治趙汴最爲明哲大抵詳書法而略紀載履繩綜覽諸家旁采衆籍以廣杜之所未備作左通補釋三十二卷又有未成者五門曰廣傳攷異駁證古音臆說錢大昕見其書歎爲絕悖通說文下筆鮮俗字年四十六卒汪家禧字漢郊仁和人諸生穎敏特異通漢易作易消息解所著書數十卷燬於火其友秀水莊仲方門人仁和許乃穀輯其遺文爲東里生燼餘集三卷文多說經粹然有家法

劉台拱字端臨寶應人性至孝六歲母朱氏歿哀如成人事繼母鍾氏與親母



同九歲作顏子頌斐然成章觀者稱爲神童中乾隆三十五年舉人屢試禮部不第是時朝廷開四庫館海內方聞綴學之士雲集台拱在都與學士朱筠編修程晉芳庶吉士戴震學士邵晉涵及其同郡御史任大椿給事中王念孫等交遊稽經攷古旦夕討論自天文律呂至於聲音文字靡不該貫其於漢宋諸儒之說不專一家而惟是之求精思所到如與古作者晤言一室而知其意指之所在比之闇若鑒蓋相伯仲也段玉裁每謂潛心三禮吾所不如選升徒縣訓導取儀禮十七篇除喪服外各繪爲圖與諸生習禮容爲發明先王制作之精意迎兩親學署雍雍色養年雖五十有孺子之慕嘗客他所忽心痛驟歸母病危甚乃悉心奉湯藥衣不解帶者數旬母病遂愈逮丁內外艱水漿不入口既歛枕苫啜粥哭泣之哀震動鄰里居喪蔬食五年出就外寢以哀毀過情卒年五十有五與同郡汪中爲文章道義交中歿撫其孤喜孫賴以成立武進臧庸常以說經之文請益台拱善之恤其窮賙其困飲食教誨十七年如一日庸心感焉台拱慕黃叔度之爲人王昶稱其有曾閔之孝著有論語駢枝經傳小

記國語補校荀子補注方言補校淮南子補校漢學拾遺文集都爲端臨遺書  
凡八卷同邑朱彬字武曹乾隆六十年舉人彬幼有至行年十一喪母哀戚如  
成人長丁父憂歛葬盡禮三年蔬食居外自少至老好學不厭承其鄉王懋竑  
經法與外兄劉台拱互相切磋每有所得輒以書札往來辨難必求其是而後  
已於訓詁聲音文字之學用力尤深著有經傳考證八卷禮記訓纂四十九卷  
虎觀諸儒所論議鄭志弟子之問答以及魏晉以降諸儒之訓釋書鈔通典御  
覽之涉是書者一以注疏爲主擷其精要緯以古今諸說其附以己意者皆援  
據精確發前人所未發他著有游道堂詩文集四卷道光十四年卒年八十有  
二子士彥吏部尙書自有傳

孔廣森字衆仲曲阜人孔子六十八代孫襲封衍聖公傳鐸之孫戶部主事繼  
汾之子乾隆三十六年進士選翰林院庶吉士散館授檢討年少入官性淡泊  
耽著述不與要人通謁告養歸不復出及居大母與父喪竟以哀卒時乾隆五  
十一年年三十五廣森聰穎特達嘗受經戴震姚鼐之門經史小學沈覽妙解

所學在公羊春秋嘗以左氏舊學湮於征南穀梁本義汨於武子王祖游謂何休志通公羊往往爲公羊疚疾其餘啖助趙匡之徒又橫生義例無當於經唯趙汧最爲近正何氏體大思精然不無承訛率臆於是旁通諸家兼采左穀擇善而從著春秋公羊通義十一卷序一卷凡諸經籍義有可通於公羊者多著錄之其不同於解詁者大端有數事謂古者諸侯分土而守分民而治有不純臣之義故各得紀年於其境內而何邵公謂唯王者然後改元立號經書元年爲託王於魯則自蹈所云反傳違戾之失其不同一也謂春秋分十二公而爲三世舊說所傳聞之世隱桓莊閔僖也所聞之世文宣成襄也所見之世昭定哀也顏安樂以爲襄公二十三年邾婁鼻我來奔云邾婁無大夫此何以書以近書也又昭公二十七年邾婁快來奔傳云邾婁無大夫此何以書以近書也二文不異同宜一世故斷自孔子生後卽爲所見之世從之其不同二也謂桓十七年經無夏二家經皆有夏獨公羊脫耳何氏謂夏者陽也月者陰也去夏者明夫人不繫於公也所不敢言其不同三也謂春秋上本天道中用王法而

下理人情天道者一日時二日月三日日王法者一日讖二日貶三日絕人情者一日尊二日親三日賢此三科九旨而何氏文諡例云三科九旨者新周固宋以春秋當新王此一科三旨也又云所見異辭所聞異辭所傳聞又異辭二科六旨也又內其國而外諸夏內諸夏而外夷狄是三科九旨也其不同四也他如何氏所據間有失者多所裨損以成一家之言又謂左氏之事詳公羊之義長春秋重義不重事皆好學深思心知其意其爲說能融會貫通使是非之旨不謬於聖人大旨見自序中儀徵阮元謂讀其書始知聖志之所在又著有大戴禮記補注十四卷詩聲類十三卷禮學卮言六卷經學卮言六卷少廣正負術內外篇六卷駢體兼有漢魏六朝初唐之勝江都汪中讀之歎爲絕手然廣森不自足作堂於其居名曰儀鄭自庶幾於康成桐城姚鼐謂其將以孔子之裔傳孔子之學雖康成猶不足以限之惜奔走家難勞思天年不充其志藝林有遺憾焉

邵晉涵字二雲餘姚人乾隆三十六年進士歸班銓選會開四庫館特詔徵晉

涵及厯城周永年休寧戴震仁和余集等入館編纂改翰林院庶吉士授編修四十五年充廣西鄉試正考官五十六年大考遷左中允擢侍講學士充文淵閣直閣事日講起居注官晉涵左目皆清羸善讀書四部七錄靡不研究嘗謂爾雅者六藝之津梁而邢疏淺陋不稱乃別爲正義二十卷以郭璞爲宗而兼采舍人樊劉李孫諸家郭有未詳者據他書附之自是承學之士多舍邢而從邵尤長於史以生在浙東習聞劉宗周黃宗羲諸緒論說明季事往往出於正史之外在史館時見永樂大典采薛居正五代史乃薈萃編次得十之八九復采冊府元龜太平御覽諸書以補其缺並參考通鑑長編諸史及宋人說部碑碣辨證條繫悉符原書一百五十卷之數書成呈御覽館臣請仿劉昫舊唐書之例列於廿三史刊布學宮詔從之由是薛史與歐陽史並傳矣嘗謂宋史自南渡後多謬慶元之間褒貶失實不如東都有王偁事略也欲先輯南都事略使條貫粗具詞簡事增又欲爲趙宋一代之志俱未卒業其後鎮洋畢沅爲續宋元通鑑屬晉涵刪補考定故其續餘稍見於審正續通鑑中晉涵性狷介不

爲要人屈嘗與會稽章學誠論修宋史宗旨晉涵曰宋人門戶之習語錄庸陋之風誠可鄙也然其立身制行出於倫常日用何可廢耶士大夫博學工文雄出當世而於辭受取與出處進退之間不能無簞豆萬鍾之擇本心既失其他又何議焉此著宋史之宗旨也學誠聞而贊然他著有孟子述義穀梁正義韓詩內傳考並足正趙岐范甯及王應麟之失而補其所遺又有皇朝大臣說迹錄方輿金石編目輯軒日記南江詩文彙嘉慶元年卒年五十有四周永年字書昌歷城人博學貫通爲時推許乾隆三十六年進士與晉涵同徵修四庫書改翰林院庶吉士授編修四十四年充貴州鄉試副考官永年在書館好深沈之思四部兵農天算術數諸家鉤積精義褒譏悉當爲同館所推重見宋元遺書湮沒者多見采於永樂大典中於是抉摘編摩自永新劉氏兄弟公是公非集以下凡得十餘家皆前人所未見者咸著於錄又以爲釋道有惑儒者獨乃開借書園聚古今書籍十萬卷供人閱覽傳鈔以廣流傳惜永年歿後漸就散佚則未定經久之法也

王念孫字懷祖高郵州人父安國官吏部尙書諡文肅自有傳八歲讀十三經畢旁涉史鑑高宗南巡以大臣子迎鑾獻文冊賜舉人乾隆四十年進士選翰林院庶吉士散館改工部主事升郎中擢陝西道御史轉吏科給事中嘉慶四年仁宗親政時川楚教匪猖獗念孫陳勦賊六事首勅大學士和珅疏語援據經義大契聖心是年授直隸永定河道六年以河隄漫口罷特旨留督辦河工工竣賞主事銜河南衡家樓河決命往查勘又命馳赴臺莊治河務尋授山東運河道在任六年調永定河道會東河總督與山東巡撫以引黃利運異議召入都決其是非念孫奏引黃入湖不能不少淤然暫行無害詔許之已而永定河水復異漲如六年之隘念孫自引罪得旨休致道光五年重宴鹿鳴卒年八十有九念孫故精熟水利書官工部著導河議上下篇及奉旨纂河源紀略議者或誤指河源所出念孫力辨其譌議乃定紀略中辨譌一門念孫所撰也既罷官日以著述自娛著讀書雜誌分逸周書戰國策管子荀子晏子春秋墨子淮南子史記漢書漢隸拾遺都八十二卷於古義之晦於鈔之誤寫校之妄改

皆一一正之一字之證博及萬卷其精於校讎如此初從休寧戴震受聲音文字訓詁其志經熟於漢學之門戶手編詩三百篇九經楚詞之韻分古音爲二十一部於支脂之三部之分段玉裁六書音均表亦見及此其分至祭盍輯爲四部則段書所未及也念孫以段書先出遂輟作又以邵晉涵先爲爾雅正義乃撰廣雅疏證日三字爲程閱十年而書成凡三十二卷其書就古音以求古義引伸觸類擴充於爾雅說文無所不達然聲音文字部分之嚴一絲不亂蓋藉張揖之書以納諸說而實多揖所未知及同時惠棟戴震所未及譬語子引之曰詁訓之旨存乎聲音字之聲同聲近者經傳往往假借學者以聲求義破其假借之字而讀本字則渙然冰釋如因假借之字強爲之解則結韁不通矣毛公詩傳多易假借之字而訓以本字已開改讀之先至康成箋詩注禮屢云某讀爲某假借之例大明後人或病康成破字者不知古字之多假借也又曰說經者期得經意而已不必墨守一家引之因推廣庭訓成經義述聞十五卷經傳釋辭十卷周秦名字解詁字典考證論者謂有清經術獨絕千古高郵王



氏一家之學三世相承與長洲惠氏相埒云引之字伯申嘉慶四年一甲進士授編修大考一等擢侍講歷官至工部尙書福建署龍溪令朱履中誣布政使李庶芸受賄總督汪志伊巡撫王紹蘭劾之對簿無佐證而持之愈急庶芸不堪遂自經命引之識之平反其獄罷督撫官爲禮部侍郎時有議爲生祖母承重丁憂三年者引之力持不可會奉使去持議者據奏行之引之還疏陳庶祖母非祖敵體不得以承重論緣情卽終身持服不足以報罔極制禮則承重之義不能加於支庶請復治喪一年舊例遂更正道光十四年卒諡文簡同州李惇字成裕乾隆四十五年進士惇與同縣王念孫賈田祖同力於學始爲諸生爲學使謝墉所賞將選拔貢會田祖卒於旅舍惇經營殯事不與試墉歎爲古人江藩好詆訶前人惇謂之曰王子雍若不作聖證論以攻康成豈非醇儒其而規人過如此著有羣經識小八卷考諸經古義二百二十餘事多前人所未發四十九年卒年五十一田祖字稻孫諸生通左氏春秋有春秋左氏通解宋絲初字守端亦高郵人乾隆四十二年拔貢生官五河清河訓導邃深經術長

於說詩著韓詩內傳攷四卷又有釋服二卷

江中字容甫江都人生七歲而孤家貧不能就外傳母鄒授以四子書稍長助書賈鬻書於市因徧讀經史百家過目成誦遂爲通人年二十補諸生乾隆四十二年拔貢生提學使者謝墉每試別置一榜署名諸生前嘗曰余之先容甫爵也若以學當北面事之其敬中如此以母老竟不朝考五十一年侍郎朱珪主江南試謂人曰吾此行必得汪中爲選首不知其不與試也中頗意經術與高郵王念孫寶應劉台拱爲友共討論之其治尙書有尙書考異治禮有儀禮校本大戴禮記校本治春秋有春秋述義治小學有爾雅校本及小學說文求端中嘗謂國朝古學之興顧炎武開其端河洛矯誣至胡渭而絀中西推步至梅文鼎而精力攻古文者閻若璩也專治漢易者惠棟也凡此皆千餘年不傳之絕學及戴震出而集其大成擬作六儒頌未成又嘗博考先秦古籍三代以上學制廢興使知古人所以爲學者凡虞夏第一周禮之制第二周衰列國第三孔門第四七十子後學者第五又列通論釋經舊聞典籍數典世官目錄凡

六而自題其端曰觀周禮太史云云當時行一事則有一書其後執書以行事又其後則事廢而書存至宋儒以後則並其書之事而去之矣又曰有官府之典籍有學士大夫之典籍故老之傳聞行一事有一書傳之後世奉以爲成憲此官府之典籍也先王之禮樂政事遭世之衰廢而不失有司徒守其文故老能言其事好古之君子閱其浸久而遂亡也而書之簡畢此學士大夫之典籍也又曰古之爲學士者官師之長但教之以其事其所誦者詩書而已其他典籍則皆官府藏而世守之民間無有也苟非其官官亦無有也其所謂士者非王侯公卿大夫之子則一命之士外此則鄉學小學而已自辟雍之制無聞太史之官失守於是布衣有授業之徒草野多載筆之士教學之官記載之職不在上而在下及其衰也諸子各以其學鳴而先王之道荒矣然當諸侯去籍秦政焚書有司所掌蕩然無存猶賴學士相傳存其一二斯不幸中之幸也又曰孔子所言則學士所能爲者留爲世教若其政教之大者聖人無位不復以教子弟又曰古人學在官府人世其官故官世其業官既失守故專門之學廢其

書彙草略具亦未成後乃即其考三代典禮及文字訓詁名物象數益以論撰  
之文爲述學內外篇凡六卷其有功經義者則有若釋三九婦人無主答問女  
子許嫁而壻死從死及守志議居喪釋服解義其表章經傳及先儒者則有若  
周官徵文左氏春秋釋疑荀卿子通論賈誼新書序其他考證之文亦有依據  
中又熟於諸史地理山川阨要講畫瞭然著有廣陵通典十卷秦蠶食六國表  
金陵地圖攷生平於詩文書翰無所不工所作廣陵對黃鶴樓銘漢上琴臺銘  
皆見稱於時他著有經義知新記一卷大戴禮正誤一卷遺詩一卷五十九年  
卒年五十一中事母以孝聞左右服勞不辭煩辱居喪哀戚過人其於知友故  
舊沒後衰落相存問過於從前道光十一年旌孝子中子喜孫自有傳同郡人  
爲漢學者又有江德量徐復汪光燾德量字量殊江都人父恂好金石文字伯  
父昱通聲音訓詁之學德量少承家學及長與汪中友勵志肄經學益進乾隆  
四十四年一甲進士授翰林院編修改江西道御史居朝多識舊聞博通掌故  
公餘鍵戶以文籍自娛著有古泉志三十卷五十八年卒年四十二復字心仲

亦江都人通九章算術光燿字晉蕃儀徵人廩生博通經史嘗辨惠氏易爻辰圖之謬又作蕘稗釋時人服其精核

武億字虛谷偃師人父紹周進士官吏部郎中億居父母喪哀痛毀瘠以讀書自勵時伊洛溢屋圯架滄以居斧朽木燎寒誦讀不輟已復從大興朱筠遊益爲博通之學乾隆四十五年進士五十六年授山東博山縣知縣縣山多土瘠民不務農地產石炭石礬燒作玻璃器皿商賈輻輳億問土俗利病免玻璃入貢革煤炭供饋里馬草豆不以累民創范泉書院進其秀者與之講敦倫理務實學而決辭無留獄雨即沛有以賄干者未敢進億廉知之值迅雷曰汝不聞雷聲乎吾矢禱久矣賄者惶悚而止輿情大治五十七年大學士和珅領步軍統領事聞妄人言山東逆匪王倫未定死密遣番役四出蹤跡之於是番役頭目杜成德等十一人橫行州縣入博山境手鐵尺飲博莫敢誰何億悉執之成德尤倔强按法痛杖之喧傳其事者曰億鹵莽利無罪將累上官巡撫吉慶遂以濫責平民刻能之而不直書其事億蒞任僅七月及去民攜老弱千餘人

走大府乞留我好官不可得則日爲運致薪米門如市焉吉慶亦感動因入覲  
偕億行爲籌捐復大學士公阿桂謂吉慶曰例禁番役出京畿奈何責縣令按  
法之非且隱其實而劾強項吏何也吉慶深自悔而格於部議遂歸嘉慶四年  
十月仁宗諭朝臣密舉京外各員內操守端潔才猷幹濟於平日居官事蹟可  
據者得赴部候旨召用億在所舉中十一月縣令捧檄至門而億先以十月卒  
矣年五十有五億學問醇粹於七經注疏三史涑水通鑑皆能闡誦既罷官貧  
不能歸所至以經史訓話教授生徒勇於著錄有羣經義證七卷經讀考異九  
卷金石三跋十卷金石文字續跋十四卷偃師金石記四卷安陽金石錄十三  
卷又有三禮義證授堂劄記詩文集等書皆旁引遠徵遇微解輒剖抉精蘊比  
辭達意以成一例大興朱珪稱億不愧好古遺直云

莊述祖字葆琛武進人世父存與官禮部侍郎自有傳述祖乾隆四十五年進  
士官山東濰縣知縣明暢吏治刑獄得中豪猾斂跡督勘蠲地衆以爲斥鹵也  
述祖指路旁草問何名曰馬帚述祖笑曰此於經石并夏正彗秀記時凡沙土

草莽者宜不何謂讎衆皆服甲寅以卓異引見還檄授桃源同知不一月乞養歸著書色養者十六年未嘗一日離左右二十一年卒述祖傳存與之學研求精密於世儒所忽不經意者覃思獨闢洞見本末著述皆義理宏達爲前賢未有以爲連山亡而尙存夏小正歸藏亡而尙有倉頡古文略可稽求義類故著夏小正經傳考釋以斗柄南門織女記天行之不變以參中大中紀日度之差以二月丁卯知夏時以正月甲寅敎塾爲麻元歲祭爲郊萬用入學爲禘著古文甲乙篇謂許叔重始一終亥偏旁條例所由出日辰幹支黃帝世大撓所作沮誦蒼頡名之以易結繩伏羲畫八卦作十言之教之後以此三十二類爲正名百物之本故歸藏爲黃帝易就許氏偏旁條例以幹支別爲序次凡許書所存及見於金石文字者分別部居書未竟而條理粗具其餘五經悉有撰著旁及逸周書尙書大傳史記白虎通於其舛句訛字佚文脫簡易次換弟草薙腋補咸有證據無不疏通曠然思慮之表若面稽古人而整比之也所著夏小正經傳攷釋十卷尙書今古文攷證七卷毛詩考證四卷毛詩周頌口義三卷五

經小學述二卷歷代載籍足徵錄一卷弟子職集解一卷漢鑊歌句解一卷石鼓然疑一卷文鈔七卷詩鈔二卷存與孫綬甲字卿珊家盡通家學尤爲述祖所愛重著尙書考異三卷釋書名一卷同族莊有可字大久勤學力行老而彌篤取諸注傳精研義理句櫛字比合諸儒之書以正其是非而自爲之說於易書詩禮春秋皆有撰述凡四十二種四百三十餘卷

戚學標字鶴泉太平人幼從天台齊召南遊稱高第高宗巡江浙學標獻南巡頌乾隆四十五年成進士官河南涉縣知縣縣苦闕布征學標請於大府得減額權林縣有兄弟爭產者集李白句爲斗粟謠以諷皆感悔性強項多與上官齟齬卒以是罷後改寧波教授未幾歸從事撰述精考證著漢學諧聲二十三卷總論一卷用說文以明古音謂六書之學三曰形聲聲不離形形者聲之本也而聲又隨乎氣氣有陰有陽故一字之音或從陰或從陽或陽而陰或陰而陽或陰陽各造其偏昔人知其然故但以某聲者明字音所出以揣其本以讀若某設爲譬況之詞使人依類而求即離絕遠去而因此聲之本以究此聲之



變無患其不合說文從某某聲從某某亦聲從某某省聲從某某讀若某某說  
與某某同竝二端兼舉聲音之學莫備於此後人惑於徐氏所附孫愐音切不  
究本讀而一二宿儒言古音如吳棫陳第顧炎武江永之流亦第就韻書辨析  
不知說文形聲相繫韻書就聲音聲說文聲氣相求韻書祇論同聲之應其部  
居錯雜分合類出臆見學者苟趣其便衷於一讀且狃於平上去入之界之不  
可移易諧聲之法廢而說文之學晦矣其書論聲一本許氏由本聲以推變聲  
既列本注旁搜古讀以爲之證末附說文補考二卷多辨正二徐謬誤又有毛  
詩證讀若干卷詩聲辨定陰陽譜四卷四書偶談四卷內外篇二卷字易二卷  
鶴泉文鈔二卷

江有誥字晉三歙縣人通音韻之學得顧炎武江永兩家書嗜之忘寢食謂江  
書能補顧所未及而分部仍多罅漏乃析江氏十三部爲二十一與戴震孔廣  
森多暗合書成寄示段玉裁玉裁深重之曰余與顧氏孔氏皆一於考古江氏  
戴氏則兼以審音晉三於前人之說擇善而從無所偏徇又精於呼等字母不

惟古音大明亦使今韻分爲二百六部者得其剖析之故韻學於是大備矣著有詩經韻讀羣經韻讀楚辭韻讀先秦韻讀漢魏韻讀唐韻四聲正譜聲表入聲表二十一部韻譜唐韻再正唐韻更定部分總名江氏音學十書王念孫父子皆服其精晚歲著說文六書錄說文分韻譜道光末室災焚其稿有誥老而目盲鬱鬱遂卒

陳熙晉原名津字析木義烏人優貢生以教習官貴州開泰龍里普定知縣仁懷同知擢湖北宜昌府知府權開泰時教匪蔣昌華擾黎平將興大獄熙晉縛其渠而貸諸脅從全活無算龍里民以釘輹殺人已誣服而兇驗不合心疑焉一日方慮囚見叢人中有曳釘輹輻輳者命執而鞠之痕宛合遂歛服普定俗糾衆相雄長號其魁曰牛叢其獲盜不謁之官輒積薪焚殺之先是有挾讎焚三尸者吏不敢捕熙晉期必得重繩以法風頓革其守宜昌也楚大水流庸衆宜昌畢力撫綏繕城垣以工代賑會秩滿將行爲留六閱月歲其事送者數千人皆泣下乞養歸未幾卒熙晉達於學積書數萬卷訂疑糾謬務窮竟原委取

裁精審嘗謂杜預解左氏有三蔽劉光伯規之而書久佚惟正義引一百七十  
三事孔穎達皆以爲非乃刺取經史百家及近儒著述以明劉義其杜非而劉  
是者中之杜是而劉非者釋之杜劉兩說義俱未安則證諸羣言斷以己意成  
春秋規過考信九卷又謂隋經籍志載光伯左氏述義四十卷不及規過據孔  
穎達序稱習杜義而攻杜氏疑規過即在述義中舊唐書經籍志載述義三十  
七卷較隋志少三卷而多規過三卷此其證也正義於規杜一百七十三事外  
又得一百四十三事蓋皆述義之文其異杜者三十事駁正甚少殆唐初奉敕  
刪定著爲令典黨同伐異勢會使然乃參稽得失援據羣言成春秋述義拾遺  
八卷他著有古文孝經述義疏證五卷帝王世紀二卷貴州風土記三十二卷  
黔中水道記四卷宋大夫集箋注三卷駱臨海集箋注十卷日損齋筆記考證  
一卷文集八卷征帆集四卷李誠字靜軒黃巖人嘉慶十八年拔貢生官雲南  
姚州州判終順甯知縣撰十三經集解二百六十卷首臚漢魏諸家之說次采  
近人精確之語而唐宋諸儒之微實者亦不廢焉嘗謂記水之書自鄆道元下

代不乏人而言山者無成編乃作萬山綱目六十卷又水道提綱補訂二十八卷宦游日記一卷微言管窺三十六卷醫家指迷一卷

丁杰原名錦鴻字升衡歸安人乾隆四十六年進士寧波府學教授杰純孝誠篤嘗奔走滇南迎父柩歸葬少家貧就書肆中讀肆力經史旁及說文音韻算數初至都適四庫館開任事者延之佐校遂與朱筠戴震盧文弨金榜程瑤田等相講習杰爲學長於校讐與盧文弨最相似得一書必審定句讀博稽他本同異於大戴禮用功尤深著有大戴禮記繹又易鄭注久佚宋王應麟裒輯成書惠棟復有增入杰審視兩本以爲多舛入鄭氏易乾鑿度注又漢書注所云鄭氏乃即注漢書之人非康成乃刊其譌定其是復摘補其未備著周易鄭注後定凡十二卷胡渭禹貢錐指號爲絕學杰摘其誤甚多嘗謂緯書移河爲界在齊呂填閼入流以自廣河患之棘由九河堙廢而害始於齊管仲能臣必不自貽伊戚班固叙溝洫志云商竭周移秦決南涯自茲距漢北亡八支則九河之塞當在秦楚之際矣惠棟尙書大傳輯本杰以爲疏舛如鮮度作荆以詰四

方誤讀困學紀聞此謬之甚者五行傳文不類讀後漢書注始知誤連皇覽也  
杰嘗與翁方綱補正朱彝尊經義考序年月博采見聞以相證合又與許言彥  
闡釋墨子上下經大有端緒方言善本始於戴震杰采獲裨益最多盧文弨以  
爲不在戴下漢隸字原考正錢塘謂得隸之義例杰又言字母三十六字不可  
增併不可顛倒見端知邦非精照爲孤清不可增濁聲也疑泥孃明微來日爲  
孤濁不可增清聲也非即邦之輕唇不可併於敦微即明之輕唇不可併於奉  
影爲曉之深喉喻爲匣之深喉曉匣影喻不可顛倒爲影曉喻匣也所著書有  
小酉山房文集嘉慶十二年卒年七十子授經嘉慶三年優貢傳經六年優貢  
皆能世其家學有雙丁之目授經佐其友嚴可均造甲乙丙丁長編以校定說  
文周春字松靄海寧人乾隆十九年進士官廣西岑溪縣知縣革陋規幾微不  
以擾民有古循吏風以憂去官岑溪人構祠祀焉嘉慶十五年重赴鹿鳴二十  
年卒年八十七春博學好古兩親服闋年未五十不謁選著十三經音略十三  
卷專考經音以陸氏釋文爲權輿參以玉篇廣均五經文字諸書音字必審音

音必歸母謹嚴細密絲毫不假他著又有中文孝經一卷爾雅補注四卷小學餘論二卷代北姓譜二卷遼金元姓譜一卷遼詩話一卷選材錄一卷杜詩雙聲疊韻譜括略八卷

孫星衍字淵如陽湖人少與同里楊芳燦洪亮吉黃景仁文學相齊袁枚品其詩曰天下奇才與訂忘年交星衍雅不欲以詩名深究經史文字音訓之學旁及諸子百家皆必通其義乾隆五十二年以一甲進士授翰林院編修充三通館校理五十四年散館試厲志賦用史記魍魎如畏大學士和珅疑爲別字置三等改部故事一甲進士改部或奏請留館又編修改官可得員外前此吳文煥有成案坤示意欲使往見星衍不肯屈節曰主事終擢員外何汲汲求人爲自是編修改主事遂爲成例官刑部爲法寬恕大學士阿桂尙書胡季堂悉器重之有疑獄輒令依古義平議所平反全活甚衆退直之暇輒理舊業洊升郎中六十年授山東兗沂曹濟道嘉慶元年七月曹南水漫灘潰決單縣地星衍與按察使康基田鳩工集夫五日夜從上游築隄遏禦之不果決基田謂此役

省國家數百萬帑金也尋權按察使凡七閱月平反數十百條活死罪誣服者十餘獄濰縣有武人犯法賄和坤門屬託大吏星衍訪捕鞠之械和門來者於衢及回本任值曹工漫溢星衍以無工處所得疏防咎特旨予留任曹工分治引河三道星衍治中段畢工校濟東道登萊道上下段省三十餘萬先是河工分賠之員或得羨餘謂之扣費星衍不取悉以給引河工費時曹工尙未合河督巡撫亟奏合龍移星衍任尋又奏稱合而復開開則分賠兩次墻工銀九萬兩當半屬後任而司事者並以歸星衍星衍亦任之曰吾既兼河務不能不爲人受過也四年丁母憂歸浙撫阮元聘主詁經精舍星衍課諸生以經史疑義及小學天部地理算學詞章不十年舍中士皆以撰述名家服闋入都仍發山東十年補督糧道十二年權布政使值侍郎廣興在省按章供張頰擾星衍不肯妄支後廣以賄敗豫東兩省多以支庫獲罪星衍不與焉十六年引疾歸星衍博極羣書勤於著述又好聚書聞人家藏有善本借鈔無虛日金石文字靡不考其源委嘗病古文尙書爲東晉梅賾所亂官刑部時即集古文尙書馬鄭

注十卷逸文二卷歸田後又爲尙書今古文注疏三十九卷其序例云尙書古注散佚今刺取書傳升爲注者五家三科之說一司馬遷從孔氏安國問故是古文說一書大傳伏生所傳歐陽高大夏侯勝小夏侯建是今文說一馬氏融鄭氏康成雖有異同多本衛氏宏賈氏逵是孔壁古文說皆疏明出典其先秦諸子所引古書說及緯書白虎通等漢魏諸儒今文說許氏說文所載孔壁古文注中存其異文異字其說則附疏中其意在網羅放失舊聞故錄漢魏人佚說爲多又兼采近代王鳴盛江聲段玉裁諸人書說惟不取趙宋以來諸人注以其時文籍散亡較今代無異聞又無師傳恐滋臆說也凡積二十二年而後成其他撰輯有周易集解十卷夏小正傳校正三卷明堂考三卷考注春秋別典十五卷爾雅廣雅詁訓韻編五卷魏三體石經殘字考一卷孔子集語十七卷晏子春秋音義二卷史記天官書考證十卷建立伏博士始末二卷竇字訪碑錄十二卷金石萃編二十卷續古文苑二十卷詩文集二十五卷二十三年卒年六十六星衍晚年所著書多付文登畢亨嘉興李貽德爲卒其業享原名



以田字恬谿初從休寧戴震游精漢人古訓之學尤長於書星衍撰尚書今古文注疏多采享說每稱以爲經學無雙中嘉慶十二年舉人道光六年以大挑知縣分發江西署安義縣有兄殺胞弟案享執不念鞠子哀泯亂倫辨刑茲無赦義不准援赦大府怒將劾之會欽程恩澤重亨事乃解後補崇義以積勞卒官年且八十矣著有九水山房文存二卷貽德字次白嘉慶二十三年舉人館星衍所相得甚歡著春秋左氏解賈服注輯述二十卷其書援引甚博字比句櫛於義有未安者亦加駁難雖使冲遠復生終未敢專樹征南之幟而盡棄舊義也又有詩攷異詩經名物攷周禮賸義十七史考異攬青閣詩鈔夢春廬詞王聘珍字貞吾南城人自幼以力學聞乾隆五十四年學使翁方綱拔貢成均爲謝啟昆阮元參訂古籍嘗客浙西與欽凌廷堪論學廷堪深許之爲人厚重誠篤廉介自守治經確守後鄭之學著大戴禮記解詁十三卷目錄一卷其言曰大戴與小戴同受業于后倉各取孔壁古文說非小戴刪大戴馬融足小戴也禮察保傳語及秦亡乃孔襲等所合藏是賈誼有取於古記非古記采及新

書也三朝記曾子乃劉氏分屬九流非大戴所裒集也又曰近代校讐不知家法王肅本點竄此經私定孔子家語反據肅本改易經文又或據唐宋類書如藝文類聚太平御覽之流增刪字句或云據永樂大典改某字作某凡茲數端率以今義繩古義以今音證古音以今文易古文遂使孔壁古奧之經變而文從字順經義由茲而亡故其發凡大旨禮典器數墨守鄭義解詁文字一依爾雅說文及兩漢經師訓詁有不知而闕無杜撰之言如五義義字據周禮注讀若儀五器五字釋若忤青史子引漢書君子養之讀若中心養養之養皆能根據經史發蒙解惑江都焦循稱其不爲增刪一仍其舊列爲三十二讀書贊之一他著經義考補九經學

凌廷堪字次仲歙縣人六歲而孤冠後始讀書慕其鄉江永戴震之學乾隆五十五年進士改教職選密國府教授奉母之官畢力著述者十餘年嘉慶十四年卒年五十三廷堪之學無所不類於六書厤算以迄古今疆域之沿革職官之異同靡不條貫尤專禮學謂古聖使人復性者學也所學者即禮也顏淵問

仁孔子告之者惟禮焉爾顏子歎道之高堅前後追博文約禮然後如有所立即立於禮之立也禮有節文度數非空言理者可託著禮經釋例十三卷謂禮儀委曲繁重必須會通其例如鄉飲酒鄉射燕禮大射不同而其爲獻酢酬旅酬無算爵之例則同聘禮覲禮不同而其爲郊勞執玉行享庭實之例則同特牲饋食少牢饋食不同而其爲尸飯主人初獻主婦亞獻賓長三獻祭畢飲酒之例則同乃區爲八例以明同中之異異中之同曰通例曰飲食例曰賓客例曰射例曰變例曰祭例曰器服例曰雜例禮經第十一篇自漢以來說者雖多由不明尊尊之旨故罕得經意乃爲封建尊尊服制考一篇附於變例之後大興朱珪讀其書贈詩推重之廷堪禮經而外復潛心於樂謂今世俗樂與古雅樂中隔唐人燕樂一關蔡季通鄭世子輩俱未之知因以隋沛公鄭譯五旦七調之說爲燕樂之本又參考段安節琵琶錄張叔夏詞源遼史樂志諸書著燕樂考原六卷江都江藩歎以爲思通鬼神他著有元遺山年譜二卷校禮堂文集三十六卷詩集十四卷儀徵阮元常命子常生從廷堪授士禮又稱其鄉射

五物考九拜解九祭解釋牲詩楚茨考諸說經之文多發古人所未發其尤卓然者則復禮三篇云同邑洪榜字汝登乾隆二十三年舉人四十一年應天津召試第一授內閣中書卒年三十有五粹於經學著明象未成終於益卦因鄭康成易贊作述贊二卷又明聲均撰四聲均和表五卷示兒切語一卷江氏永切字六百十有六是書增補百三十九字又以字母見溪等字注於廣韻之目每字之上以定喉吻舌齒唇五音蓋其書宗江戴二家之說而加詳焉爲人律身以正待人以誠生平服膺戴震戴震所著孟子字義疏證當時讀者不能通其義惟榜以爲功不在禹下撰震行狀載與彭紹升書朱筠見之曰可不必載戴氏可傳者不在此榜乃上書辨論江藩在吳下見其書歎曰洪君可謂衛道之儒矣汪龍字辰叔亦延堪同邑人乾隆五十一年舉人嗜古博學尤精於詩嘗讀詩生民元鳥二篇疑鄭箋迹乳卵生之說不若毛詩謂姜嫄簡狄從帝嚳祀郊禘之正遂稽傳箋同異用力於是經者數十年成毛詩異義四卷毛詩申成十卷卒年八十二

桂馥字冬卉曲阜人乾隆五十五年進士選雲南永平縣知縣卒於官馥博涉羣書尤潛心小學精通聲義嘗謂士不通經不足致用而訓詁不明不足以通經故自諸生以至通籍四十年間日取許氏說文與諸經之義相疏證爲說文義證五十卷力窮根柢爲一生精力所在馥與段玉裁生同時同治說文學者以桂段並稱而兩人兩不相見書亦未見亦異事也蓋段氏之書聲義兼明而尤邃於聲桂氏之書聲亦並及而尤博於義段氏鉤索比傳自以爲能冥合許君之旨勇於自信自成一家之言故破字荆義爲多桂氏教佐許說發揮旁通令學者引申貫注自得其義之所歸故段書約而粹難通闢桂書繁而尋省易了夫語其得於心則段勝矣語其便於人則段或未之先也其專臚古籍不下己意則以意在博證求通展轉羣乳觸長無方亦如王氏廣雅疏證阮氏經籍纂詁之類非以己意爲獨斷者及馥就宦滇南追念舊聞隨筆疏記十卷以其細碎比之匠門木材題曰札樸然馥嘗引徐幹中論鄒儒博學務於物名詳於器械考於訓詁摘其章句而不能統其大義之所極以獲先王之心故使學者

勞思慮而不知道費日月而無功成謂近日學者風尚六書動成習氣偶涉名物自負倉雅略講點畫妄議斯冰叩以經典大義茫乎未之聞也此尤爲同時小學家所不能言足以鍼盲起廢他著有晚學集十二卷許瀚字印林日照人道光十五年舉人官嶧縣教諭博綜經史及金石文字訓詁尤深至校勘宋元明本書籍精審不減黃丕烈顧廣圻晚年爲靈石楊氏校刊桂馥說文義證於清河甫成而板燬於捻寇並所藏經籍金石俱盡遂挹鬱而沒年七十他著有韓詩外傳勘誤攀古小廬文

江聲字叔漢元和人七歲就傳讀書問讀書何爲師以取科第爲言聲求所以進於是者年二十九遭父疾晨夕侍牀褥不解衣帶至自滌盥窺視穢以驗疾進退及居憂哀毀骨立逾三年容戚然如新喪者侍母疾居喪亦如父歿時族黨哀其至行旣孤因不復事科舉業讀尙書怪古文與今文不類又怪孔傳非安國所爲年三十五師事同郡通儒惠棟得讀所著古文尙書考及閭若璩古文疏證乃知古文及孔傳皆晉時人僞作於是集漢儒之說以注二十九篇漢

注不備則旁考他書精研古訓成尙書集注音疏十二卷附補誼九條識僞字一條尙書集注音疏前後述外編一卷尙書經師系表也經文注疏皆以古篆書之疑僞古文者始於宋之吳才老朱子以後吳草廬郝京山梅鷟皆不能得其要領至本朝閻惠兩徵君所著之書乃能發其作僞之跡勦竊之原若刊正經文疏明古注則皆未之及也及聲出而集大成焉聲又病後世深求考老轉注之義至以篆迹求之因爲六書說謂建類一首卽始一終亥五百四十部之首同意相受卽凡某之屬皆從某也陽湖孫星衍亦推其說以爲爾雅肇祖元胎之屬始也始亦建類一首肇祖元胎皆爲始亦同意相受說文此類亦甚多推考老之訓如口部之咽噎也噎咽也走部之走趨也趨走也猶之考注老老轉注考矣其同在口部走部卽建類一首也聲亦以爲然而戴震以爲貫全部則義太廣聲折之曰若止考老爲轉注不已溢乎且諧聲一義不貫全部乎聲與震以學問相推重其不相附和如此生平不作楷書卽與人往來筆札皆作古篆俗儒往往非笑之而聲不顧也其寫尙書濕水字澁字不在說文濕据淮

南作屢聲據爾雅義作孟人始或怪之後服其非臆說顧其書終以時俗不便  
識讀不甚行於時聲性耿介不慕榮利交游如王鳴盛王昶畢沅皆重其品藻  
而聲未嘗以私事干之當事益重其人嘉慶元年舉孝廉方正四年卒年七十  
有九晚年因不諧俗動與時違取周易艮背之義自號艮庭學者稱爲艮庭先  
生云子鏐吳縣學生孫沅優貢生世傳其學沅字子蘭金壇段玉裁僑居蘇州  
沅出入其門者數十年沅先著說文釋例後承玉裁屬以段書十七部諧聲表  
之列某聲某聲者爲綱而件系之聲復生聲則依其次第爲說文解字音均表  
凡十七卷沅於段紕謬處略箋其失其言曰支脂之之爲三眞臻先與諄文欣  
魂痕之爲二皆陸氏之舊而段氏矜爲獨得之秘嚴分其界以自殊異凡許氏  
所合韻處皆多方改使離之而一部之與十二部亦不使相通故韻之讀若秘  
改爲逼肥之乙聲刪去聲字必之弋亦聲改爲八亦聲而於開章一篆說解極  
一物三字即是一部十二部十五部合韻之理於是絕不敢言其韻直至亥字  
下重文說之也十二十三兩部之相通者惟民昏二字爲梗故力去昏字以就



其說畀字由聲十五部也緝从畀得聲而緝卽古綦字在一部遂改畀字爲由聲以避十五部與一部之合音凡此皆段氏之癡結處也又曰段氏論音謂古無去故譜諸書平而上入沅意古音有去無入平輕去重平引成上去促成入上入之字少於平去職是故耳北人語言入皆成去古音所沿至今猶舊非敢苟異參之或然沅當時而質玉裁親許駁勘故有不同云卒年七十二

錢大昭字晦之嘉定人大昕弟大昕深於經史一門羣從皆治古學能文章爲東南之望大昭少於大昕者二十年事兄如嚴師得其指授時有兩蘇之比壯歲遊京師嘗校錄四庫全書人間未見之秘皆得縱觀由是學問益浩博又善於決擇其說經及小學之書能直入漢儒闕奧嘗欲從事爾雅大昕與書謂六經皆以明道未有不通訓詁而能知道者欲窮六經之旨必自爾雅始大昭乃著爾雅釋文補三卷及廣雅疏義二十卷又著說文統釋六十卷其例十一曰疏證以佐古義凡經典古義與許合者在所必收二曰音切以復古音以徐鉉徐鉉等不知古音往往誤讀又許君言讀若某者卽有某音今並補正又說文

本有傳音隋書經籍志有說文音隱顏氏家訓引之唐以前傳注家多稱說文音某今並采附本字之下三日考異以後古本凡古本暨古書所引有異同者悉取以折中四曰辨俗以正譌字凡經典相承俗字及徐氏新補新附字皆辨證詳明別爲一卷附後五曰通義以明互借凡經典之同物同音於古本是通用書皆引經證之六曰從母以明孳乳如完利髡輒等字皆於元下注云从此七曰別體以廣異義凡重文中之籀篆古文奇字皆有所從其許君未言者亦略釋之經典兩用者則引而證焉八曰正譌以訂刊誤凡許君不收之字注中不應有又字畫脫誤者並校正之九曰崇古以知古字如鵠鵠鵠鵠之類經典有不从鳥者此古今字今注曰古用某十曰補字以免漏略如由希免囀等三十九字从此得聲者甚多而書中脫落有子無母非許例今酌補之亦別爲一卷附後大昭於正史尤精兩漢晉謂注史與注經不同注經以明理爲宗理寓於訓詁訓詁明而理自見注史以達事爲主事不明訓詁雖精無益也每怪服虔應劭之於漢書裴駰徐廣之於史記其時去古未遠釋官載記碑刻尙多不

能會而通之考異質疑徒戔戔於訓詁乃著兩漢書辨疑四十卷於地理官制  
皆有所得又仿其例著三國志辨疑三卷又以宋熊方所補後漢書年表祇取  
材范書陳志乃於正史外兼取山經地志金石子集其體例依班氏之舊而略  
變道之著後漢書補表八卷計所補王侯多於熊書百三十人論者謂視萬斯  
同歷代史表有過之無不及他著有詩古訓十二卷經說十卷補續漢書藝文  
志二卷後漢郡國令長攷一卷邇言二卷生平不嗜榮利名其讀書之所曰可  
廬欲漸至於古之隨遇自足者嘉慶元年舉孝廉方正子東垣字既勤嘉慶三  
年舉人官浙江松陽縣知縣以艱歸服闋補上虞縣東垣與弟繹侗皆潛研經  
史金石時稱三鳳嘗與繹侗及同縣秦鑒勘訂鄭志又與繹侗鑒及桐鄉金錫  
鬯輯釋崇文總目世稱精本東垣爲學沈博而知要以世傳孟子注疏繆舛特  
其乃輯劉熙綦母遂陸善經諸儒古注及顧炎武閻若璣同時師友之論附以  
己見並正其音讀考其異同爲孟子解誼十四卷他著有小爾雅校證二卷補  
經義考四十卷列代建元表勤有堂文集侗字同人於歷算之學亦能究其原

本大昕撰宋遼金元四史朔閏考未竟而卒侗證以羣書金石文字增輯一千三百餘條日夕檢閱推算幾忘寢食卒因是感疾而歿朱駿聲字豐芒吳縣人年十三受許氏說一讀即通曉從錢大昕游錢一見奇之曰衣鉢之傳將在子矣嘉慶二十三年舉人官黟縣訓導咸豐元年以截取知縣入都進呈所著說文通訓定聲及古今韻準束韻說雅共四十卷文宗披覽嘉其治賞國子監博士銜旋遷揚州府學教授引疾未之官八年卒年七十一駿聲著述甚博不求知於世兼長推步明通象數嘗論爾雅太歲在寅推大昕說謂其時自以實測之歲星在亥定太歲在寅命之曰攝提格以紀年歲星所合之辰即爲太歲然歲星閏百四十四年而超一辰至秦漢而甲寅之年歲星在丑太歲應在子漢詔書以太初元年爲攝提格者因六十紀年之名歷年以次排敘不能頓超一辰故仍命以攝提格也於是後人以寅卯等爲太歲強以攝提格等爲歲陰其實爾雅所云歲陽歲陰非如後人說也他著有左傳旁通十卷左傳識小錄三卷夏小正補傳一卷離騷補注一卷子孔彰字仲我能傳父業著有說文粹三

編十三經漢注中興將帥別傳